

意盡嗟予蒲柳姿去日若飛隼草衰有復榮我
髮寧再鬢微官雖置散束帶終自憫漸退用嬾
言千載付一哂白樂天詩曰猶被妻兒教
漸退莫求致仕且分司

冬夜

百錢買菅席錦茵亦何加疋布縫簾裘安用狐
腋奢昨者南山僧松肪寄一車可以照讀書堅
坐待朝霞顧影爲發笑山童雙髻丫一掬琴高
魚聊用薦夜茶

村東

村西行藥到村東沙路溪流曲折通莫問梅花
開早晚杖藜到處卽春風

小園

新作小溪園牽藤迤縛門釣舩橫北渚樵路接
東村靜坐依林樾慵眠傍竹根還家日已夕棲
雀開黃昏

書適

老翁垂七十其實似童兒山果啼呼覓鄉儻喜
笑隨羣嬉累瓦墻獨立照盆池夏挾殘書讀渾
如上學時

又

家食身無役耆年方未衰寓歡那待酒隨意或
成詩窮達元非我寃親竟是誰惟嗟見事晚枉
却鬢邊絲

狂夫

狂夫與世本難諧醉傲王侯亦壯哉奕奕方收
巖際電酣酣已起枕間雷回天力在人終歎入
月星來敵自摧千載鬼雄皆國士直令窮死未
須哀

白髮

白髮今年一倍增閉門養此老無能牛羊被野
霜天晚禾稼連雲歲事登未午春炊餘脫粟乍
寒包裹有簾緡自憐未廢詩書業父子蓬窗共

集百言集
三
一燈

檢舊詩偶見在蜀日江瀆池醉歸之篇悵
然有感

江瀆池頭爛醉歸青旗日晚插城扉正馳玉勒
衝紅雨又挾金丸伺翠衣老境漸侵歡意盡舊
遊欲說故人稀憑高三歎君知否倦鷁無風亦
退飛

十一月四日風雨大作

風卷江湖雨闍村四山聲作海濤翻溪柴火輒
蠻羶暖我與狸奴不出門

又

僵臥孤村不自哀尚思爲國戍輪臺夜闌臥聽
風吹雨鐵馬冰河入夢來

冬日觀漁獵者

人閑漁獵各相從南陌東阡處處逢繡羽觸機
餘耿介錦鱗出網尚噏喁傍觀扶杖常移日就

買還家足御冬更待風霜都過盡却從春野看
春農

雨晴

山川炳煥似闢國風雨退收如解嚴老子真成
無一事抱孫負日坐茆簷

病起

少年射虎南山下惡馬強弓看似無老病卽今
那可說出門十步要人扶

奉祠

明窗松石供琴薦小鼎山泉煮藥苗乞得奉祠
還自愧猶將名姓到中朝

假寐見海山異甚作小詩記之

海如黛色深浪作雪點濺數峰黃金山巉絕出
水面此非想與因了了目中見何時真往遊浮
世付掣電

松下縱筆

自掃松陰寄醉眠龍吟虎嘯滿霜天却息初到
人間世似是唐堯丙子年

又

老不能閑莫笑予五千言豈世間書青松折取
當塵尾爲子試談天地初

又

種玉餐芝術不傳金丹下手更茫然陶公妙訣
吾曾受但聽松風自得仙

又

髯龍大矯欲飛去百尺蒼藤羅絡之應笑此翁
才不進故將老氣起吾詩

拜勅口號

黃紙如鴉字今朝下九天身居鏡湖曲銜帶武
夷仙曰絕絲毫事年請百萬錢祠俸錢粟絮帛
歲計千緡有疇
恭惟優老政千古照青編

又

扶病中庭拜君恩抵海深頓增新祿格暫拂舊
朝簪心欲先營酒兒言且贖琴人生奉祠貴喜
色動山林僕以官視大卿監俸給皆增於管尤為忝竊也

閑居

土鎚茶七椀瓦甑稷三升兀兀能言石騰騰有
髮僧淨巾裁白氍挂杖采紅藤尚喜冬來健逢
山得遍登

十一月十八日蒙恩再領冲佑鄰里來賀

謝以長句

綠章封事徹虛皇黃紙除書降野堂海上春常
探先到壺中日已不勝長水街再署仙班貴鶴
料重支玉粒香便掛朝冠亦良易金銅茶籠本
相忘往時嘗使閩者例餽茶三年今不講已久余益未嘗霑及也

題老學菴壁

此生生計愈蕭然架竹苫茆只數椽萬卷古今
消永日一窗昏曉送流年太平民樂無愁歎衰

老形枯少睡眠喚得南村跛童子煎茶掃地亦
隨緣

冬晴日得閑遊偶作

不用清歌素與蠻閑愁已似解連環閨年春近
梅差早澤國風和雪尙慳詩思長橋蹇驢上棊
聲流水古松間牋天公事君知否正乞柴荆到
處閑

示元禮

燕居侍立出扶行見汝成童我眼明但使鄉閭
稱善士布衣未必媿公卿

書巢冬夜待旦

埽葉擁堦寒犬行編茆護柵老雞鳴風霜漸逼
歲時晚形影相依燈火明史策午年媿豪傑關
河萬里愴功名固應死抱無窮恨老病何由更
請纓

醉後莊門望西南諸山

身是咸陽舊酒徒龍鍾猶復泥村酤百年略似
夢長短一醉且隨家有無登覽未應慚脚力功
名正爾歎頭顱夕陽又凭闌干立誰画三山岸
憤圖

著書

平生著書汗馬牛一事不施今白頭河洛未清
非我責山林高臥復何求愚公可笑金堆屋老
子唯須糟築丘華表無人識歸鶴煙波底處有

馴鷗

探奔

我遊東村衝暮煙斷橋流水鳴濺濺欲尋梅花
作一笑數枝忽到拄杖邊高標元合著山澤絕
豔豈復施丹鉛定知曾授餐玉法不爾恐是凌
波仙錦江賦詩忽萬里蓬山把酒今三年相逢
風味宛如昨人生何者非前緣頗思取醉極清
賞杖頭幸有百許錢但判插破烏紗帽莫記吹

落黃金船

歲暮風雨

驕風起海滢浩蕩東北來鐵騎掠陣過秋濤觸
山回老夫北窗下坐守寒爐灰處世困憂患萬
事學低摧便欲滅燈睡門閉不敢開竝海固多
風汝孱良可哀念管少年日從戎何壯哉獨騎
洮河馬涉渭夜銜枚

又

一冬少雨雪人意常昏昏夜半有奇事雨聲卷
江村陸子真老農破屋依頽垣扶持衰病身收
召譴逐魂手烹牆陰齋美若乳下豚聽雨取一
醉不厭村酒渾眼青燈生暈衣弊蝨可捫父子
幸相守萬事何足論

自夏秋匱甚慨然有感

萬卷縱橫眼欲枯老猶閉戶誦唐虞故人誰復
訪生死鄰父幸能通有無雲子翻匙新稻飯天

吳坼繡舊衣襦時平得掩松根骨也勝王孫泣
路隅

題四仙像

反虜鯨鯢世共讎漢公勛業過伊周市門灑淚
塵埃裏誰與朝廷植委裘

梅福

又

世上年光東逝波咸陽銅狄幾摩挲神仙不死
成何事只向秋風感慨多

蘄子訓

又

曾看四嶽薦虞鰥閱歲三千一瞬間歸臥青山
孤絕處白驢常伴白雲閑

張果

又

蓮花峯下張超谷此老何曾有死生聞道風清
月明夜至今鼻息亂松聲

陳搏

自責

窮途敢恃舌猶存小築城西十里村未掛衣冠

蘇東坡詩集 十一
蘇東坡
慙士節免輸薪粢荷君恩文章跌宕忘繩墨學
問荒唐失本原仕宦一生成底事子孫世世記
吾言

自解

四十頭顱已可知殘年至此復何爲著書不直
一盃水看鏡空添千縷絲達宦獨驕儒作戲後
生速化吏爲師有冠當掛無餘說但恨衰翁見
事遲

午睡起消搖園中因登山麓薄暮乃歸

老病攻百骸微纏困束縛頽然一熟睡如獲萬
金藥窗明竹影亂林暖鳥聲樂灰深香欲上火
活湯正作毫甌羞茗荈銅洗供盥濯整巾出庭
戶曳杖歷巖壑遙岑見木杪細水齧籬脚踏踏
遂忘歸清嘯送日落

羣兒

野行遇羣兒呼笑運甕忙共爲小浮圖鱗响當

道旁蜺殼以注燈
椀足以焚香須臾一闋散無
益亦何傷古來富貴人
峩冠登廟堂謀謨一悖
謬縣宇失太康坐令安業民
血喋而屍僵傳呼
一朝寵遺患日月長均爲兒戲爾
禍機孰深藏
我作羣兒詩持用砭世盲

久疾灼艾小愈晚出門外

老境侵凌病滿軀
火攻下策得枝梧
沽來村酒
初判醉叱去山童
不遣扶霜重木凋
鴉可數溪
清魚見鶴相呼
興闌却掩空扉臥
閑看青燈照
藥爐

夙興弄筆偶書

憂患熏心少睡眠
雞號窗白一欣然
道旁歲晚
貂裘弊燈下書成
鐵硯穿杜老慣聽兒索飯
鄭
公何啻客無氈
春風不解嫌貧病
尙擬花前醉
放顛

縱筆

山合水將窮真宜著放翁醉嫌天地迮老覺歲
時公偃蹇松逃世翩仙鶴駕風舊交零落盡一
笑與誰同

冬晴閑步東村由故塘還舍作

故園三徑可婆娑遇興遵塗負杖歌霜重天寒
山色淡草枯野曠獵徒多解刀尚可謀黃犢揮
帖無由致白鵝自計長閑何所恨一生心事在
煙波

紅藤拄杖獨相羊路遶東村小嶺傍水落枯萍

黏蟹椹

鄉人植竹以取蟹謂之曰椹

雲開寒日上魚梁洛陽

二頃言良是光範三書計本狂歷盡危機識天
意要令閑健返耕桑

十二月八日步至西村

臘月風和意已春時因散策過吾鄰草煙漠漠
柴門裏牛迹重重野水濱多病所須唯藥物差
科未動是閑人今朝佛粥更相餽更覺江村節

物新

夜聞湖中漁歌

夢回一燈翳復明臥聞湖上漁歌聲嗚嗚年低
忽更起嫋嫋欲斷還微縈初隨缺月墮煙浦已
和殘角吹江城悲傷似擊漸離筑忠憤如撫桓
伊箏放臣萬里憂國淚戍客白首懷鄉情峽猿
失侶方獨宿沙雁垂翅猶遐征巴巫竹枝短亭
晚瀟湘欸乃孤舟橫世間此恨故相似使我百

感何由平

忽得京書有感

白髮蒼顏七十翁朽株枯木略相同如山儲藥
難醫拙齊斗堆金不換窮昨夢已拋空劫外殘
年全付醉眠中故人苦未知心事一紙空煩寄
斷鴻

晚步門外書觸目

數椽茆屋鏡湖傍喬木蒼煙一徑長酒賤過門

多醉叟天寒棲畝有餘糧歌呼草市知人樂簫
鼓鼓祠喜歲穰只道老來詩息盡未妨擊壤頌
時康

親舊書來多問近況以詩畬之

耐辱推頹百不能居然老病住菴僧流年速似
一彈指更事多於三折肱庭樹影中聞夜汲隣
機聲裏對寒燈沈詩任筆俱忘盡酒戶新來却
少增

開書篋見韓无咎書有感

老覺人間萬事非幽棲幸已脫塵鞿殘年得的
不啻足舊友半空誰與歸開眼不妨成一夢翦
翎何至羨羣飛龍圖老子今安在把卷燈前淚
滿衣

夜大雪歌

朔風吹雪飛萬里三更款款鳴窗紙初疑天女
下散花復恐麻姑行擲米異哉凍硯已生冰信

矣重衾如潑水山中臥澗松竹折庭前蔽地烏
鳶死昨日之煖殊昏昏桃李欲坼春滿園陰陽
錯繆世或有物窮則變古所言雖云明年幸一
麥凍餒溝壑知誰存嗚呼今夕之雪未足論所
憂明日巉巖高塞門

寄宇文成州

成州太守比何如夢裏依然把臂初復起卿嘗
用卿法長閑吾實愛吾廬五湖風雨孤舟夜萬

里關山一紙書正使兩翁長隔濶子孫它日莫
相疎

示子聿

我鑽故紙似癡蠅汝復孳孳不少懲父子更兼
師友分夜深常共短檠燈

雪

平郊漫漫覺天低況復寒雲結慘悽老子方驚
飛蛺蝶羣兒已說聚狡狴中宵鳶墮頻摧木徹

旦雞瘖重壓棲只待新晴梅塢去青鞵未怯踏
春泥

夜坐

耿耿殘燈夜未央負牆閑對篆盤香風號東北
河水合月落西南竹影長孤鶴欲棲頻繞樹寒
龜無息穩搯床頽然坐睡那知曉推戶朝曦已
滿廊

春雨

午夜聽春雨發生端及期世憂殊未艾天意固
難知士節承平日人材南渡時後生聞見狹撫
枕歎吾衰

夢與數客劇飲或請賦詩予已大醉縱筆
書一絕覺而錄之

高談雄辯憑陵酒豪竹哀絲蹴蹋春占斷名園
排日醉不教虛作太平人

世事

世事說來猶可厭
宦情夢裏亦應無
山林已結三生願
朝市誰非九折途
醉舞盃盤無藉在
狂吟風月不枝梧
何人今擅丹青藝
爲画蘇門長嘯圖

二子

兩楹夢後少真儒
毀譽徒勞豈識渠
孟子無功如管仲
揚雄有賦似相如
敬王事業知誰繼
漢易工夫故不疎
孤學背時空絕歎
白頭窮巷抱

遺書

謝郭希呂送石洞酒

從事今朝真到齊
春和盎盎却秋凄
色如夷甫玉麈尾
價敵茂陵金褭蹄
瑞露頗疑名太過
橐泉猶恨韻差低
山園雪後梅花動
一榼常須手自攜

瑞露桂盃酒得名甚盛橐泉岐下酒自管名冠關中而失之太勁

飲酒

六十四民安在哉
千八百國俱煙埃
世人一漚

寄巨海對酒不醉吁可哀平生清狂今白首芒
屨布裘稱野叟晨興窗几網蛛絲石洞書來餉
名酒看月直到無月時尋花直到花片飛醉中
往往花壓帽鄰里聚看湖邊歸先生兩耳不須
洗利名不到先生耳狂歌起舞君勿嘲青山白
雲終醉死

無題

金鞭朱彈憶春遊萬里橋東罨畫樓夢倩曉風
吹不去書憑春雁寄無由鏡中顏鬢今如此曩
下朋儔好在不在篋有吳牋三萬箇擬將細字寫
新愁

雨雪兼旬有賦

冬溫息雨雪稍久已復厭初寒人怨咨千載語
猶驗人心自無常天命本不僭積陰勢已極浮
雲會當斂山花紅酣酣谿水綠濼濼短蓬倘可
具與子東入剡

北窗睡起

違物離人不計年
萬金難買北窗眠
高懷元在羲皇上
大事已明空劫前
樵路細盤雲外嶺
釣筒倒插水中天
此時消息君知否
千載巢由未足賢

立春

紹熙又見四番春
春日春盤節物新
獨酌三盃愁對影
例添一歲老
催人菊芽冒土如爭出
柳

色搖村已漸勻
身是蘭亭山下客
未容逸少擅清真

曉枕

殘漏鏖鏖急
明星磊磊高一從
安枕臥無復攬衣
勞熨斗生晨火
熏籠覆縕袍
一盃山藥酒
紅日滿亭臯

落梅

雪虐風饕愈凜然
花中氣節最高堅
過時自合

飄零去耻向東君更乞憐

又

醉折殘梅一兩枝不妨桃李自逢時向來冰雪凝嚴地力幹春回竟是誰

閑居無客所與度日筆硯紙墨而已戲作

長句

水複山重客到稀文房四士獨相依黃金那得與齊價白首自應同告歸韞玉面凹觀墨聚浣

花理膩覺豪飛

韞玉溜硯名浣花蜀牋名

興闌却欲燒香睡

閑聽松聲晝掩扉

壬子除夕

前村後村燎火明東家西家爆竹聲老逢新正幸強健却視徂歲何崢嶸兒時祝身願事王談笑可使中原清豈知一出踐憂患斂縮豈復希功名雪霜滿鬢覺死近節物到眼空歎驚蠶官社公正暖熱春盤儻鼓爭施行蓬門車馬所不

至山僧野叟相逢迎嗚呼吾曹見事晚古俗實
在蚩蚩氓茆簷一笑語兒子明當滿舉屠蘇觥

癸丑正月二日

朱顏不老畫中人綠酒追歡夢裏身堪笑三山
衰病叟閉門寂寂過新春

又

菊散抽綠滿枯荻繞舍梅花已遍開須信今春
春事早江鄉開歲有犇雷

避世行

君渴未嘗飲鳩羽君飢未嘗食鳥喙惟其知之
審取捨不待議有眼看青天對客實少味有口
啖松柏火食太多事作官蓄妻孥陷穽安所避
刀鋸與鼎鑊孰匪君自致欲求人迹不到處忘
形麋鹿與俱逝杳杳白雲青嶂間千歲巢居常
避世

稽山農

余作避世行以爲不可常也復作此篇

華胥氏之國可以十吾居無懷氏之民可以爲
吾友眼如巖電不看人腹似鴟夷惟貯酒周公
禮樂寂不傳司馬兵法亡亦久賴有神農之學
存至今扶犁近可師野叟粗繒大布以禦冬黃
梁黑黍身自春園畦剪韭勝肉美社瓮撥醅如
粥醲安得天下常年豐老死不見傳邊烽利名
畫斷莫挂口子孫世作稽山農

牧牛兒

南村牧牛兒赤脚踏牛立衣穿江風冷笠敗山
雨急長陂望若遠隘巷忽相及兒歸牛入欄煙
火茆簷溼

讀書未終卷而睡有感

暮年緣一嬾百事俱棄置今遂嬾到書把卷輒
坐睡其餘嬾則已感此獨歔歛念咎少壯時日
夜痛磨礪誓言死爲期身在敢暴棄寧知未死
前殆欲負此志顏回稱好學楊雄乃識字勉哉

慕前修自畫聖所諱

早春新晴

柳弄春柔拂小潭山橫霽色卷浮嵐
飛揚旛脚擲東北零落梅花餘二三
村店疎燈新賣酒神祠疊鼓正祈蠶
幽人睡起東園去芹茁萱芽又滿籃

枕上聞禽聲

屏掩輕寒酒半消斷香殘夢兩無膠
開年春意

遽如許破曉一聲娑餅焦

感舊

憶從南鄭入成都氣俗豪華海內無
故苑燕開車載酒名姬舞罷斗量珠
浣花江路青螭舫槎柳毬場白雪駒
回首壯遊真昨夢一竿風月老南湖

夜雨

澤國寒多雨疇人夜少眠不緣醒作病
只合醉

終年庭艸已爭茁園梅空自憐重雲不難抉無
劍倚青天

又

寒雨連三夕幽居只數椽家貧輕過節身老怯
增年日月悲歌裏關山淚眼邊梅花自開落歎
息爲誰妍

又

人日春猶淺雞晨夜向闌殘缸燈暈小單枕雨
聲寒難補皇天漏空息后土乾山家尊酒薄懷
抱若爲寬

初晴野步

入市路三叉緣山港半斜疎籬帶殘雪幽竇瀉
湍沙好鳥晴相語芳蘭暎欲芽病餘無脚力隨
處憩人家

明日復雨排悶

湖上孤村冷欲冰更堪衰與病相瘞夢回點滴

簷間雨心折青熒帳外燈雖有數椽常似客僅
存一肉未成僧披衣偶取南華讀打破愁城喜
不勝

又

此老在家如出家蒲團趺坐讀南華溼雲不散
雁呼伴幽室無聲燈墜花心法先當破窠窟世
緣最忌養萌芽行年七十方知悔萬事無涯生
有涯

小室

小室僅容膝焚香觀昨非出門寧有碍知我正
須希霜橘爭棊樂仙壺賣藥歸平生釣竿手不
解叩黃扉

浮世

浮世如流水滔滔日夜東百年均夢寐萬古一
虛空青鳥來雲外銅駝臥棘中相逢惟痛飲令
我憶無功

紅梅

苧蘿山下越谿女戲作長安時世粧白白朱朱
雖小異斷知不是百花香

又

雪裏溪頭已占春小園又試晚粧新放翁老去
風情在惱得梅花醉似人

湖上

今朝雨初晴湖上好天色落梅紛可藉桑柳亦
已拆老夫病良已竝水散輕策冉冉春物新忽
忽衰髮白四方豈不樂嬾惰畏遠客惟當勤買
酒東城復南陌

晴甫一日復大風雨連日不止遣懷

書劔當年隘九州白頭歸臥一窗幽染成草色
春猶淺老盡梅花雨未休得句已無前輩賞開
編時與古人遊山房小甕今朝熟不恨尊前自
獻酬

癸丑上元三夕皆大雨雪

雨雪連三日孤城冷欲冰
泥深唯響屐風惡更
吹燈空惱追歡客何關
在定僧一盃嘗豉煎寒
影對峻嶒

寓歎

人生各自有窮通
世事寧論拙與工
裹馬草心空許國
不龜手藥却成功
早朝玉勒千門雪
夜坐蓬窗萬壑風
俗得奇書且勤讀
小兒能續地

爐紅

子坦以新昌木炭二白斤來

幽興

雨後梅花無復在
老來酒盞頓成疎
身如海燕不逢社
家似瓜牛僅有廬
短髮坐肩嬾中散
深居謝客病相如
從今何以消長日
剗種芭蕉學草書

緗梅

疎影橫斜事已非
小園日暮鎖芳菲
素綃應怯

東風息故著重重淺色衣

又

香似海沉黃似酒不禁風雪最遲開放翁欲作
梅花譜蠟屐檣笳日日來

又

紅梅眼看風吹盡更有細梅亦已無天與色香
天自愛不教一點上蜂鬚

劍南詩藁卷第二十六

劔南詩彙目錄

卷第二十七

僧廬 春日 春遊 懷管 記夢 春

陰 睡起行至門外有賦 早春首四 醉

吟首三 贈劉改之秀才 蓬門 龍鍾

送佛照光老赴徑山 春社有感 春社

首四 村夜 山園遣興 次韻陳機宜見

贈 野意 戒殺 余年四十六入峽忽

復二十三年感懷賦長句 山行 雨中

排悶 杜敬未寓僧舍開軒松下以虛瀨

名之來求詩 贈徑山鋤書記 五月一

日作 春夏之交衰病相仍過芒種始健

戲作 自嗟 枕上述夢 雨中排悶

小軒夏夜涼甚偶得長句呈杜未高秀才

憶替 夏日晚興 老翁 困甚戲書

歲晚 戲詠山陰風物 老健 六月

晦日作 喜雨 門外納涼 贈蘇趙叟

兄弟 癸丑七夕 英語 書歎 秋曉

倚闌 癸丑七月二十七夜夢遊華嶽廟

二首 僕頃在征西大幕登高望關輔樂之

每冀王師拓定得卜居焉暇日記此意以

示子孫 讀陶詩 秋夜感舊十二韻

幽居 醉題 雨涼小飲戲作 題三壁

書憤 秋興 雨夜排悶二首 秋日出

遊戲作首二

雨中夕食戲作首三

自警

寄方瞳胡先生 雨夕焚香 秋雨初霽

徙倚門外有作 雨中作 贈老雞首二

秋晚閑步隣曲以予近嘗臥病皆欣然迎

勞 雨夜 醉臥道傍 枕上聞急雨首二

得趙若川書因寄 夢至洛中觀牡丹

繁麗溢目覺而有賦 閑居對食書媿首二

秋夜獨酌 風雲交作戲題 自嘲

書室 數日秋氣已淡清坐無酒戲題長

句 五更起坐 谿上雜言 厭事 方

池 癸丑重九登山亭追懷頃在興元常

以是日獵中梁山下樂甚慨然賦詩予于

是生六十有九年矣

劍南詩彙卷第二十七

僧廬

僧廬土木塗金碧四出徵求如羽檄富商豪吏
多厚積宜其棄金如瓦礫貧民妻子半菽食一
飢轉作溝中瘠賦歛鞭笞縣庭赤持以與僧亦
不愔古者養民如養兒勸相農事憂其飢露臺
百金止不爲尙媿七月周公詩流俗紛紛豈知
此熟視剗殘謂當爾傑屋大像無時止安得疲

民免飢死

春日

節節足足雀噪檐朱朱白白花窺簾坐旁設酒
隨時飲床上堆書信手拈寓世無求猶役役杜
門不病亦厭厭春濃日永有佳處睡味著人如
蜜甜

春遊

鏡湖春遊甲吳越鶯花如海城南陌十里笙歌
聲不絕不待清暘寒食節青絲玉瓶挈新釀
柳穿魚初出浪花外金羈絡雪駒橋邊翠幙圍
螭舫怕雨愁陰人未知時時微雨却相宜養花
天色君須記正在輕雲嫩靄時

懷晉

晉遇高皇帝華纓接俊遊年光一彈指世事幾
浮漚故國但青嶂羈臣今白頭平生笑李廣癡
絕望封侯

記夢

夢不出心境曠然成遠遊
花殘杜城醉木落華山秋
戰血磨長劔塵痕洗故裘
那知覺來處身臥五湖舟

春陰

老境三年病新春十日陰
孤舟鏡湖客萬里王關心
出岫雲多態呼風鳥獨吟
讀書惟恐盡傾酒却愁深

睡起行至門外有賦

窗黑停書課屏深養病眸
雨聲工破睡酒力不禁愁
兀兀披衣起昏昏曳杖遊
柴荆晚未閉隔水數歸牛

早春

舊學樊遲稼新通汜勝書
不成籌國論且復愛吾廬

又

具牛將犢行野雉挾雌鳴農事不可緩閑人亦
勸耕

又

近陂牛渾白遠浦鴨頭青一櫂悠然去東風吹
酒醒

又

西村一抹煙柳弱小桃妍要識春風處先生拄
杖前

醉吟

少日沉迷汗簡青如今毀譽兩冥冥書生弄筆
如何信只合花前醉不醒

又

驅使難憑赤丁子傳呼底用蒼頭兒世間如夢
身如寄春去花空欲泥誰

又

牽經引禮人誰聽是古非今世莫憎何似對花

傾綠酒自歌一曲醉騰騰

贈劉改之秀才

君居古荊州醉膽天宇小尚不拜龐公况肯依
劉表胸中九淵蛟龍蟠筆底六月冰雹寒有時
大叫脫烏幘不怕酒盃如海寬放翁七十病欲
死相逢尙能刮眼看李廣不生楚漢間封侯萬
戶宜其難

蓬門

莫笑蓬門雀可羅老農正要養天和穿林裊裊
孫登嘯叩角嗚嗚審戚歌睡美到明三展轉飢
甘捧腹一摩挲床頭更聽糟床注造物私吾亦
已多

龍鍾

龍鍾一老寄荒村鼎食山棲久已分平日氣吞
雲夢澤算年緣在武夷君捨榆敢羨垂天翼倚
市從嗤刺繡文幸有筆床茶竈在孤舟更入剡

谿雲

送佛照光老赴徑山

大覺住育王拗折拄杖強到底佛照住育王挑
得鉢囊隨詔起從來宗門話只要句不死說同
說異菴外人若是吾宗寧有此日日風雨今日
晴萬里春光入帝城傳宣江上走中使開堂座
下羅公卿御香靄靄雲英布法音浩浩潮收聲
報恩一句作麼道常遣山林見太平

春社有感

顛顛前朝白髮郎洞庭賦祿玷恩光寸心未與
年俱老萬事惟憑酒暫忘穿仗兩曾觀揖遜扶
犁獨幸返耕桑耆年凋落還堪嘆社飲推排冠
一鄉

三山百家之聚
年莫余先者

春社

桑眼初開麥正青勃姑聲裏雨冥冥今朝有喜
君知否到處人家醉不醒

又

社肉如林社酒濃鄉鄰羅拜祝年豐太平氣象
吾能說盡在蓼蓼社鼓中

又

柴門西畔枕陂塘社雨新添一尺強臺省諸公
方袞袞故應分喜到耕桑

又

太平處處是優場社日兒童喜欲狂且看參軍
喚蒼鶻京都新禁舞三郎

村夜

寂寂山村夜悠然醉倚門月昏天有暈風軟水
無痕迹爲遭讒遠身由不仕尊敢嗟車馬絕同
社自雞豚

山園遣興

輸逋告糴走比隣恤患分灾累故人安得此身
無一事林中數筍過殘春

次韵陳機宜見贈

邂逅今年得若人，翛然不染庾公塵。
息幽屈子歌山鬼，語妙陳王賦洛神。
初接笑談忘老憊，熟觀風度愛清真。
花時飛盡頻行樂，莫學衰翁睡過春。

野意

隄長逾十里，村小只三家。
山客弛樵擔，溪翁鳴釣車。
花深迷蝶夢，雨急散蜂衙。
衰疾新年減，青鞵上若耶。

戒殺

物生天地間，同此一太虛。
林林各自植，但坐形骸拘。
日夜相殘殺，曾不置斯須。
皮毛備裘褐，膏血資甘腴。
雞鶩爭蔬輩，尚食稗與芻。
飛潛何預汝，禍乃及禽魚。
豺虎之害人，亦爲飢所驅。
汝顧不自省，何暇議彼歟。
又于人類中，各私六尺軀。
方其忿怒時，流血視若無。
我欲反其源，默觀受

氣初挺刃之所加慘若在我膚朝飯一盂豆莫
飯一盃蔬捫腹茹簷下陶然歡有餘

余年四十六入峽忽復二十三年感懷賦

長句

當年吊古巴東峽雪灑扁舟見早梅宋玉宅邊
新酒美巫山廟下算猿哀樵柯爛盡棋方劇客
甌炊成夢未回已把癡頑敵憂患不勞團扇念

寒灰

劉夢得團扇歌曰當時初入
君懷袖豈念寒爐有死灰

山行

七十衰翁短鬢斑藥瓢藤杖伴清閑平生惡路
羊腸仄晚歲羸軀飯顆山一寸塏餘青靄外數
聲鐘下翠微間往來處處皆奇絕莫道先生興
盡還

雨中排悶

一春苦沈陰未省見桃李已逢暗寒食更值雨
甲子重雲失南山寸步困泥滓籜龍已觶觶一

飽差可喜

杜敬叔寓僧舍開軒松下以虛瀨名之來

求詩

君不見洛陽八節灘未至一舍聞驚湍生綃六
幅誰所畫入眼能令三伏寒又不見桐廬七里
瀨濺雪跳珠舞澎湃羊裘老子去千年絕世孤
風凜如在杜陵之孫今勝流飄然不必事遠遊
結茆古寺聽松吹坐擅洛水桐江秋放翁百念
俱已矣獨有好奇心未死約君少待秋月明拖
琴來宿寫灘聲

贈徑山鈺書記

徑山老將無勅敵百萬魔軍俱埽迹座下何人
策雋功籌略縱橫鈺記室鈺公聲名滿吳會惟
有放翁最先識奕奕揮毫王粲詩翩翩插羽陳
琳檄風雷東海起伏龍縹藉園丘薦蒼壁徑山
入門第一義萬口譁言真稱職我謂鈺公豈止

此徑山鉢袋渠能得一枝白拂倘付之會見青
天飛霹靂

五月一日作

處處稻分秧家家麥上場敢悲身老大獨幸歲
豐穰酪美朱櫻熟菰青角黍香翛然一竹尺飽
受北窗涼

春夏之交衰病相仍過芒種始健戲作

藥裹關心百不知可憐筆硯鎖蛛絲倒壺猶有
莫春酒開卷遂無初夏詩戶外逢人驚隔濶燈
前顧影嘆支離癡頑未伏常愁臥鼓缶長謠樂
聖時

自嗟

青蔬半畝老生涯霜鬢蕭蕭只自嗟勛業蹉跎
空許國文詞淺俗不名家殘骸皆作麒麟楨舊
友仍非處士牙收得平生釣竿手長安西日夏
須遮

枕上述夢

五月十二日
雞鳴時作

江湖送老一漁舟，清夢猶成塞上遊。
生馬駒馳鐵蹠腕，古鏡歌奏錦衣褱。
玉關雪急傳烽火，青海雲開見戍樓。
白首不侯非所恨，啾嚶床篋死堪羞。

雨中排悶

潤入盆山綠葉稠，倦攤書帙小窗幽。
浮雲不卷時時雨，薄酒無功日日愁。
積潦漲來妨躡屐，好山遮盡罷登樓。
青秧搖蕩湖堤決，一飽前知未易謀。

小軒夏夜涼甚，偶得長句呈杜叔高秀才。
遙夜簾櫳已偕秋，闌干星斗挂檐頭。
鶴翻清影移枝宿，螢弄孤光拂箬流。
榻上琴書紛枕籍，髮根風露冷飈飈。
故人莫笑幽居陋，此夕真從造物遊。

憶簪

憶昔西征日飛騰尚少年軍書插鳥羽戍壘候
狼煙渭水秋風夜岐山曉雪天金鞵馳叱撥繡
袂舞嬋娟但恨功名晚寧知老病纏虎頭空有
相麟閣竟無緣壯士埋巴峽獨孤策孤身臥海壖
安西九千里孫武十三篇裘嘆蘇秦弊鞭憂祖
逖先何時聞詔下遣將入幽燕

夏日晚興

高掛虛窗對綠池鳥啼聲歇柳陰移含風珍簟

閑眠處疊雪輕衫新浴時泉冷甘瓜開碧玉手

香素藕胷

一作雪

長絲夕陽四面漁歌起又赴隣

翁把釣期

老翁

老翁垂七十不復歎頭顱浩蕩新漁艇凋零舊
酒徒巖徐元衮衮管葛亦區區獨有欣然處登
山未用扶

函甚戲書

官如枝頭乾不受雨露恩身如水上浮泛泛寧
 有根刈茹以苦屋縛柴以為門故人分祿米隣
 父餉魚殮前門吏徵租後門質襦幘不敢謀歲
 月且復支朝昏雨餘幽花拆亦可侑清尊吾生
 信已乎終老此山村

歲晚

日月忽其逝吾生猶幾何不從屠狗醉卽和飯
 牛歌斧鉞稽天討金繒約虜和無情恨荆棘歲

晚暗銅駝

戲詠山陰風物

萬里秦吳稅駕遲還鄉已歎鬢成絲城邊綠樹

山陰道水際朱扉夏禹祠項里楊梅鹽可徹太白

梁園吟云玉盤楊梅為君設吳鹽如花皎白雪不知楊梅酸者乃薦以鹽佳品未嘗用也湘

湖蓴菜豉偏空蓴菜最宜鹽豉所謂未下鹽豉者言下鹽豉則非羊酪可敵蓋

盛言蓴羹之美爾圖經草草常堪恨好事它年采此詩

老健

才智不足狂有餘此身老健更誰如齒牢尚可
決乾肉目瞭未妨觀細書不怪模稜啗了了但
驚矜臂勸徐徐曉看瓜壘初牽蔓一笑呼兒勿
廢鉏

六月晦日作

長夏忽云過徂年行且休川原方渴雨草木已
驚秋露蔓晨猶泣風蟬算更適明窗對清鏡世
事判悠悠

喜雨

雷車隆隆南山陽電光煜煜北斗飭急雨橫斜
生土香草木蘇醒起什僵芭蕉抽心鳳尾長薜
荔引蔓龍鱗蒼葛幘竹簟夜更涼超然真欲無
羲皇常年七月蚊殷廊今夕肅肅疑飛霜水車
罷踏肩斗藏家家買酒歌時康

門外納涼

玄雲障落日早得數刻涼寒泉灑門前浴罷倚

胡床蟬聲晚愈壯藕花凋更香嘯詠忽已久野
色來蒼蒼新月淡無輝大星森有芒水鳥亦歸
宿飛鳴掠橫塘人生各有時何至終身忙撫髀
三太息墜露溼衣裳

贈蘇趙叟兄弟

君家真德門才傑生衮衮託契則甚深所恨相
識晚攜文數過我每讀必三反譬如天廐駒真
是渥洼產閉門萬卷讀要極原本才難聖所
嘆期子敢不遠

癸丑七夕

風露中庭十丈寬天河仰視白漫漫難尋仙客
禁槎路且伴吾兒乞巧盤秋早時聞桐葉墜夜
涼已怯紵衣單民無餘力年多惡退士私憂實
萬端

笑語

喬嶽成塵巨海枯欲求笑語一人無黃金已作

飛煙去癡漢終身守藥鑪

書歎

少年志欲埽胡塵至老寧知不少伸覽鏡已悲
身潦倒橫戈空覺膽輪困生無鮑叔能知己死
有要離與卜鄰西望不須揩病眼長安冠劍幾
番新

秋曉倚闌

雲罇纖纖玉一鈎小庭風露夏清柔老來朋舊
凋零盡獨倚闌干特地愁

癸丑七月二十七夜夢遊華嶽廟

驛樹秋風急關城暮角悲平生忠憤意來拜華

山祠

又

牲碑僞正朔祠祝虜衣冠神亦豈堪此出門山
雨寒

僕頃在征西大幕登高望關輔樂之每冀

王師拓定得卜居焉暇日記此意以示子孫

八月殘暑退秋聲滿庭樹豈無四方志衰病迫
霜露遼東黃頭奴稔惡天震怒南北會當一老
我悲不遇子孫勉西遷俗厚吾所慕約已收孤
嫠教子立門戶黍稌暗阡陌鶉雉足七箸永爲
河渭民勿憚關山路

讀陶詩

我詩慕淵明恨不造其微退歸亦已晚飲酒或
庶幾雨餘鉏瓜壟月下坐釣磯千載無斯人吾
將誰與歸

秋夜感舊十二韻

冷螢綴蓬根忽復照高樹年光逝不畱百感集
遲算往者秦蜀間慷慨事征戍猿啼鬼迷店馬
噤飛石舖鬼迷店在大散關下飛石舖在小益道中常有崩石危嶺高入
雲朽棧劣容步天近星宿大江惡蛟鼉怒意氣

頗自奇性命那復顧最懷清渭上衝雪夜掠渡
封侯細事爾所冀垂竹素兜鍪竟何成豈獨儒
冠誤當時妄校尉旗纛今照路浩歌遂成章聊
慰老不遇

幽居

海溼結茆新退藏常畏人已侵垂老境尙愛不
貲身丹灶長生藥巢居上古民秋來有奇事鷗
鷺日相親

醉題

勿笑山翁病滿軀胸中俠氣未全無雙瞳遇醉
猶如電五木隨呼盡作盧代北胡兒富牟馬江
南奇士出菰蘆何由親奉平戎詔蹴踏關中建
帝都

雨涼小飲戲作

孤村小院雨輪涼團扇流塵簟避床蛩思感秋
吟壞壁螢光藥暗遶高粱巾箱字細成褫嬾醜

醜盃深斷送狂坐睡覺來人已散簾櫳時度玉

簪香

玉簪
花名

題空壁

迹是滄浪客家居罷稭村秋菰芼羹滑社酒帶
醑渾勛業知難遂文章不更論惟餘此身在分
付與乾坤

書憤

山河自古有乖分京洛腥羶實未聞劇盜曾從

宗父命遺民猶望岳家軍上天悔禍終至虜公

道何人肯散羣白首自知疎報國尚憑精意祝

爐熏

宗澤守東都巨盜來歸百萬
號宗爺岳家軍蓋紹興初語

秋興

秋風又滿會稽城有客飄然萬事輕久向林間
得佳趣不知身外有浮名蒲萄雨足初全紫烏
柏霜前已半頽欲把一盃終覺嬾老來懷抱爲
誰傾

雨夜排悶

羸病愁燈影羈懷怯雨聲
新秋忽已半垂老若
爲情金印兒嬉事青編
身後名何如破窗下袖
手送餘生

又

村巷時時雨江城夜夜砧
沉憂羈客夢孤憤遠
臣心身病常須藥囊空
未贖琴明朝鏡中髮飽
受雪霜侵

秋日出遊戲作

箬帽蓑衣自道宜
不論晴雨著無時
半醒半醉
人爭看是聖是凡誰得知

又

薄雲韜日未成雨
野水齧沙爭赴溪
書冊嬾看
聊作伴酒壺不飲亦常攜

雨中夕食戲作

高秋滴堦雨作泥
黃昏爭林雀欲棲
臨窗一飯

頗簡快半升脫粟澆黃齏

又

粗飶寒菹到手空屬饜也與八珍同家人見慣
渾閑事笑殺新來兩髻童

又

粳粒微紅愧食珍蔣芽初白喜嘗新摩挲便腹
無憂責我是人間得計人

自警

墮髮滿晨梳荒畦入晚鉏涼生團扇厄病退短
筇踈聖道功殊淺塵緣習未除青燈幸如故勉
近讀殘書

寄方瞳胡先生

形槁神彌王心虛腦自凝平生一酒榼萬里兩
行滕安枕存玄牝叁居養絳陵他年喬嶽下正
晝看飛騰古仙人飛升皆在五嶽名山故人少見者

雨夕焚香

芭蕉葉上雨催涼
蟋蟀聲中夜漸長
緜十二經
眞太漫與君共此一爐香

秋雨初霽徙倚門外有作

三十餘年此結廬
客來不用笑迂疎
前身已預蘭亭會
老眼曾窺禹穴書
浮瓮社醪香出屋
登場秋稼穗盈車
蕭蕭蓬鬢雖衰矣
追逐鄉鄰尙有餘

雨中作

野外偏于看雨宜
映空渡水細如絲
川雲俗澗支琴石
澗水分流洗藥池
未肯高眠成老態
却緣危坐得新詩
悠然更助鄰丁喜
漸近收蕎下麥時

贈老雞

峩峩赤憤先羣輩
喔喔長鳴益四郊
意氣雖雄無處用
風霜從我老衡茆

又

場中啄粟樹頭棲三唱明星出尙低關路元無
孟嘗客吳兒莫議會稽雞

秋晚閑步隣曲以予近嘗臥病皆欣然迎
勞

放翁病起出門行績女窺籬牧豎迎酒似粥醲
知社到甍如盤大喜秋成歸來早覺人情好對
此彌將世事輕紅樹青山只如昨長安拜免幾
公卿

雨夜

歲晚茆茨劣自容齒搖將脫髮將童心遊萬里
關河外身臥一窗風雨中醫不可招惟忍病書
猶能讀足忘窮夜闌睡覺蛩聲裏時見燈花落
碎紅

醉臥道傍

爛醉今朝臥道傍鄉間笑爲護牛羊高懷那遣
羣兒覺至理真能萬事忘喚起瘦軀猶嵬我扶

歸困曉更芒洋凍壑快嚼茆簷下拍手從人笑
老狂

枕上聞急雨

枕上雨聲如許奇殘荷敲竹共催詩喚回二十
三年夢燈火雲安驛裏時

又

酒病羈愁一洗空長歌高枕雨聲中傳聞谿港

深三尺明日扁舟處處通

港涸久不通舟楫
兩日雨殊可喜也

得趙若川書因寄

澤居路絕人不到晨起忽傳雙鯉魚儲淚一升
悲世事減愁三尺看君書龍墀對策言傷直山
邑迎親計未疎老病閉門誰省錄因風時肯問
何如

夢至洛中觀牡丹繁麗溢目覺而有賦

兩京初駕小羊車顛顛江湖歲月賒老去已忘
天下事夢中猶看洛陽花妖魂豔骨千年在朱

彈金鞭一笑譁寄語羶裘莫癡絕祈連還汝舊
風沙

閑居對食書媿

遊宦無功坐免歸誰令盤筋極甘肥錦鱗差尾
魚登俎繡羽駢頭雉觸機桑落滿壺春盎盎雨
前轉磴雪霏霏殘年何地酬君賜自古羈臣厭
蕨薇

又

老病家居幸歲穰味兼南北飫枯腸滿脾蜜熟
餽饉美下棧羊肥餽飪香鱖刺河魴初出水迷
離穴兔正迎霜山僧一鉢無餘念應笑先生爲
口忙

秋夜獨酌

壯志隨年減羈愁與夜長月高寒暈淡花坼露
叢香仕畏讒銷骨歸判酒腐腸青燈寫孤影相
勸盡餘觴

風雲交作戲題

雲脚如龍爪空中挾雨來何關風伯事欲到却
吹回

自嘲

歲月推遷萬事非放翁可笑白頭癡此生竟出
古人下有志尚如年少時僻學固應知者少長
歌莫問和予誰自嘲自解君毋怪老大從人百
不宜

書室

客來莫笑席塵凝靜處工夫却少增黑蟻常繙
魯壁簡瘦蛟時落越溪藤尙能豪健如霜鶻未
遽衰殘學凍蠅更喜論文有兒子夜窗相對短
檠燈

數日秋氣已深清坐無酒戲題長句

漸近重陽天氣嘉數椽茆竹淡生涯山童擁篲
掃黃葉鄰女傍籬收碧花避俗要生輪四角出

門何啻路三义晚窗酒盡無多歎試問前村好事家

五更起坐

世間醉夢過浮生誰肯披衣坐五更煜煜心光
回自照縣縣踵息浩無聲古人得意捐糟粕癡
子何知墮化城七十老翁須努力隣雞纔唱又
窗明

谿上雜言

谿上之丘吾可以休谿中之舟吾可以遊一裘
雖弊可度風雪虛一簞雖薄未有旦夕憂媿于
此心鼎食其敢飽負其所學蟬冕增吾羞古人
誰謂不可見黃卷猶能覩生面百穀蕤蕤知稷
功九州茫茫開禹甸巍巍成功亦何有治亂但
如翻覆手逢時皆可致唐虞比身管樂寧非苟
樹桑釀酒蕃雞豚是中端有王業存一朝遇合
得施設千載始知吾道尊

厭事

厭事便微疾貪眠幸早寒人雖笑疎嬾天實閔
衰殘韋布何曾賤茆茨本自寬黃花插烏帽一
醉有餘歡

方池

莫笑方池小清泉數斛寬照花紅錦爛洗研黑
蛟蟠日取供茶鼎時來擲釣竿秋風過欄角也
解作微瀾

癸丑重九登山亭追懷頃在興元常以是
日獵中梁山下樂甚慨然賦詩予于是生
六十有九年矣

生年六十九重陽轍遍秦吳歲月長南鄭從戎
嗟尚壯中梁縱獵最難忘離披雉拂雕鞍墮獨
俛狐穿古冢藏夢斷酒醒今萬里亦逢佳節重
悲傷

劔南詩彙目錄

卷第二十八

感懷

首四

出遊

首二

讀杜詩偶成

秋夜

卽事

物有可歎者因戲作數語以識之

老懷

對酒

東村散步有懷張漢州

晚寒自東村步歸

排悶

首六

初寒病

中有感

放歌行

山頭石

有客

幽

居

首五

野興


首四

買油

繫舟

首二

初冬



至近村 古築城曲首四 山園 將軍行

古別離 寄子虞 泛舟自中堰入湖

夜歸舟中作 蓬萊閣聞大風 小出

塞曲 冬日園中作 登山亭 拄杖歌

冬晴 冬夕首二 十月十五夜對月

久疾首三 舍北望牛頭山山有延勝寺先

太傅書室在焉六年前嘗泛小江往遊寺

焚於睦寇書堂無復存矣 十月十九日

大風作寒閉戶竟日 寄天封明老 村

居首二 十月下旬暄甚戲作小詩 霜天

雜興首三 連日風雨寒甚夜忽大風明日

遂晴 懷管 寄題王俊卿看山堂首二

絕歎 風雨 晚過鄰曲 莫仲謙挽詞

病起 晚興 贈粉鼻 與兒輩論李

杜韓柳文章偶成 夢至小益 懷紹興

間往還諸公 磨衲道衣 溪上作首二

小憩 癸丑十一月下旬溫燠如春晦日

忽大風作雪 占城櫻竹拄杖 西城

東城 斯道 病起山居日有幽事戲作

二首 蝸廬 冬夜讀書 二首 十二月九日

枕上作 記夢 三首 鏡湖女

劍南詩彙目錄 卷二十八終

劍南詩彙卷第二十八

感懷

老病與世絕屏迹三家村我居一何陋舉手屋
可捫客至不能迎堅坐度朝昏一窗修竹下超
然傲羲軒外物自變遷內景常默存黃流不注
海浩浩朝崑崙妙道本自得至言初不煩功成
出緒餘猶足康黎元

又

劍南詩集
卜居鏡湖上一菴環翠屏竹林藏豁豁嶺路蟠
青冥騫騰立奇石嶄絕瞻危亭車馬雖埽迹猿
鳥與忘形我行半九州蹋盡芒屨青豈知雪滿
鬢于茲做雲肩丹砂收箭鏃茯苓斲人形遼天
渺歸鶴一瞬三千齡

又

平生喜栽花賴以娛寂莫小園財一畝粲粲萬
跗萼典衣買紫桂輟食致紅藥汗眠香草茂掩
苒煙柳弱踏雨探花開障風畏花落雖慙童心
在終勝塵事縛今日疾稍間天氣亦清廓啼鳥
寒不歸可以侑吾酌

又

殘年迫衰謝嬰疾歸鄉枌諸賢渡江初總角幸
有聞才非楚倚相亦能讀典墳夫豈或使之後
死與斯文世儒鑿戶牖道術將瓜分孤陋守一
說百氏殆可焚後來豈無人鼻聖誰揮斤巍巍

貞觀治房魏出河汾

出遊

采藥今朝偶出遊溪邊小立喚漁舟未須著句
悲搖落嫩日和風不似秋

又

朝行躡屩穿幽谷莫返褰裳涉亂流提起短筇
成一笑每煩上座爲分憂

讀杜詩偶成

一念寧容事物侵天魔元自是知音拾遺大欠
修行力小吏相輕尙動心

秋夜卽事

鳥宿牛歸戶欲扃燈前老子影伶俜溼雲不散
初聞雁深竹微明尙有螢一卷舊書開蠹簡半
升濁酒倒餘瓶藥閑欲擬歸來作小草斜行滿
曲屏

物有可歎者因戲作數語以識之

雞棲及我未掩扉犬雖遠出莫自歸司晨警夜
職交舉簸糠棄粒報亦微查查雙鵲更媿汝庭
樹夜宿常相依豈憐主人老寂寞暝熱蓬戶不
忍違養鴟甚恩健卽去養鷹雖久飽亦飛嗟哉
物性厚薄異使我隱几空歔歔

老懷

身見高皇再造初名場流輩略無餘舊書科斗
纔存字薄業蝸牛僅有廬迂士豈堪新貴使少

年自與老人疎荒園寂寂堆霜葉抱瓮何妨日
灌蔬

對酒

古今共有死長短無百年方其欲瞑時如困得
熟眠世以生時心安度死者情疑其不忍去一
笑可絕纓區區計生死不如持一觴一觴澆不
平萬事俱可忘待酒忘萬事猶是役於酒醉醒
不到處天魔自奔走

東村散步有懷張漢州

扶杖村東路秋來始此回
寒鴉盤陣起野菊臥
枝開憂國丹心折
懷人雪鬢催房湖八千里
那得尺書來

晚寒自東村步歸

夕陽下平野落葉滿荒街
村店賣麪麪人家燒
豆蘗溪風透布褐
草露溼芒屨骨相元如此
何由與世諧

排悶

丈夫結髮志功名
大事真當以死爭
我咎駐車
籌筆驛孔明千載尚如生

又

曾攜一劔遠從戎
秦趙關河顧盼中
老去功名
無復夢凌煙分付黑頭公

又

四十從軍渭水邊
功名無命氣猶全
白頭爛醉

東吳市自拔長刀割羶肩

又

西塞山前吹笛聲曲終已過雒陽城君能洗盡
世間念何處樓臺無月明

又

萬里風中寄斷蓬古來虛死幾英雄拔山力與
回天勢不滿先生一笑中

又

風霜九月冷颼颼湖海飄然一布裘親見宓義
初畫卦轉頭三十萬春秋

初寒病中有感

楚水楓林霜露新白頭一叟正吟呻牛衣未起
王章疾馬磨何傷許靖貧治道本來存簡冊神
州誰與靜煙塵新亭對泣猶稀見況覓夷吾一
輩人

放歌行

君不見汾陽富貴近古無二十四考書中書又
不見慈明起自布衣中九十五日至三公人生
窮達各有命拂衣徑去猶差勝介推焚死終不
悔梁鴻寄食吾何病安用隨牒東復西獻諛耐
辱希階梯初無公論判涇渭徒使新貴矜雲泥
稽山一老貧無食衣破履穿面黧黑誰知快意
舉世無南山之南北山北

山頭石

秋風萬木實春雨百草生造物初何心時至自
枯榮惟有山頭石歲月浩莫測不知四時運常
帶太古色老翁一生居此山脚力欲盡猶躋攀
時時撫石三歎息安得此身如爾頑

有客

有客隱華山學道忘歲月靈苗生絕壁光景中
夜發斲根食之盡倏爾換金骨通籙虎豹闔日
預通明謁綠章奏封事誤字坐責罰後身幸不

忘去日苦飄忽白首三入朝未省及黔突方逃
申公鉗已取卞和刑福微不盈眚罪衆幾擢髮
上天豈憐之寸步使屢蹶拔其利欲根還之山
水窟洗心謝宿愆世事等胡粵

幽居

窮老苦畏事雅意在丘壑結茆鏡湖上卒歲安
寂莫有門常嬾開壁間挂雙屨猶恨未遠人
夜聞城角

又

來客無僮奴剝啄自叩戶主人亦蕭然茗飲不
能具清言正絕倒日莫亟散去更欲盡所懷衣
薄畏霜露

又

山園手栽花日夜數花時花開亦已落一歡自
無期勸君強自娛勿作兒女悲春風染柳條不
染君鬢絲

又

種菜三四畦畜豚七八箇永言給賓祭且復課
慵惰霜清黃犢健土潤小雨過冬畊不可失努
力勿安臥

又

放翁家山陰其貧蓋一國骨相異虎頭祠祿真
雞肋有米薪未具坐待至曛黑躬耕豈所難一
飽非爾力

野興

身似孤鴻鍛羽翰悲鳴飲啄住江干酒闌客息
多新感病起衰顏失故丹倦枕忽聞中夜雨疎
砧又報一年寒幽窗晤語無來客空倚詩情強
自寬

又

老去癡頑百不能非醒非醉日騰騰敲門惟有
徵租吏好事元無送米僧舊俗不還誰復念古

書雖在漸難憑平生意氣今如此惆悵西窗半
夜燈

又

殘水涓涓入野塘菊花猶放數枝黃悶思野步
便晴日病怯冬溫喜薄霜湯餅鬻成新兔美膾
壑擣罷綠橙香人間富貴知何得商略山林却
味長

又

水作縠紋微起伏天如卵色半陰晴偶來竹下
揩頤坐却向藤陰曳杖行西埭人喧荻船過東
村燈上緯車鳴幽居應接真無暇莫訝經年嬾
入城

買油

習氣年來埽未平夢回猶喜讀書聲冬裘不贖
渾閑事且爲吾兒續短檠

繫舟

繫舟江浦待潮平
歎息無人共月明
歷盡世間多少事
飄然依舊老書生

又

地曠月明鋪素練
霜寒河淺拂輕綃
手扶萬里天壇杖
夜過前村禹會橋

初冬至近村

南國霜常晚
初冬葉始紅
曠懷牛屋下
美睡雨聲中
江水憶浮馬

西鄙軍行溪過澗皆浮而濟

嶓山息射熊

何由効唐將
八十下遼東

古築城曲

築城聲酸嘶
漢月傍城低
白骨若不掩
高與長城齊

又

長城高際天
三十萬人守
一日詔書來
扶蘇先授首

又

百丈築城身千步掘城壕咸陽三月火始悔此
徒勞

又

嶧山訪秦碑斷裂無完筆惟有築城詞哀怨如
當日

山園

山泉引派漲清池野蔓移根絡短籬藝果極知
非老事接花聊復効兒嬉提壺言語開顏聽斷

木衣襦緩步窺莫笑題詩還滿紙小園幽事要
君知

將軍行

將軍入奏平燕策持笏榻前親指畫天山熱海
在目中下殿卽曰名烜赫馳出都門雪初霽直
過黃河水未圻繡旗方掠桑乾渡羽檄已入金
臺陌勇士如鷹健欲飛孱王似兔何勞搦戎服
押俘獻廟社正衙第賞頒詔冊端門賜酺天下

慶御觴尚恨滄溟迮從來文吏喜相輕聊遣濡
毫書竹帛

古別離

孤城窮巷秋寂寂美人停梭夜歎息空園露溼
荆棘枝荒蹊月照狐狸迹憶君去時兒在腹走
如黃犢爺未識紫姑吉語元無據况憑瓦兆占
歸日嫁來不省出門前魂夢何因識酒泉粉黛
磨鏡不忍照女子盛時無十年

寄子虞

吾兒適淮壩送之梅市橋三年安得過思汝雙
鬢凋今年當代婦秋色已蕭蕭迎汝不憚遠夢
泝錢塘潮人事不可料邑民挽婦撓郡牧部使
者交章聞之朝增秩復使畱此事久寂寥念汝
未育子大女方垂髻小女聞學行想像扶牀嬌
汝少知讀易外物莫能搖但願早舉孫不必七
葉貂歸來郎罷前相從樂簞瓢

泛舟自中堰入湖

水縮沙洲出霜清木葉丹鷺羣橫澹靄鴉陣報
初寒冷落人情見衰遲世念闌惟畱一句子村
舍話團團

夜歸舟中作

意薄楊脩喚小兒孤舟自笑髮成絲放開癡腹
無非夢拈起幽懷總是詩霜下忽驚桐葉盡灘
生更覺水聲奇餘年那恨驅黃犢除却爲農百

不宜

蓬萊間聞大風

天風搖蕩萬松聲卷海頽山得我驚觸灩澦堆
秋起拖塵臯闌下夜還營荷戈老氣縱橫枉看
劔新詩欬唾成興盡却尋湖上路醉看月墮斗
杓傾

平島塞曲

全師出雁塞百戰運龍韜金絡洮州馬珠裝夏

國刀度沙風破肉攻壘雪平壕明日受降處甲
齊熊耳高

冬日園中作

園荒闕埽除籬敗且枝梧久旱池萍死新霜野
蔓枯寒爐殊未議濁酒却時酤飛動郊原興飢
鷹待指呼

登山亭

新得天台古澗藤強扶衰疾蹋峻嶒登高臨遠
雖多感歎老嗟卑却未曾紙上是非難盡信人
間禍福有相藥早知等是枯魚肆乞水何須望
斗升

拄杖歌

道人四壁空無有一炷清香閑袖手床邊獨有
拄杖子疾病相扶真我友禪房按膝秋聽雨野
店敲門算賒酒畏途九折歷欲盡世上誰如君
耐久老矣更踏千山雲何可一日無此君歸來

燈前夜欲半露柱說法君應聞

冬晴

吳中霜雪晚初冬正佳時丹楓未辭林黃菊猶
殘枝鳴雁過長空纖鱗泳清池氣和未重裘臨
水照鬚眉悠然據石坐亦復出門嬉野老荷鋤
至一笑成幽期

冬夕

犬吠驚飄葉禽喧換宿枝墮空霜肅肅垂地斗
離離野叟讀書罷高城吹角悲功名渾鎔料老
病却如期

又

不寐起中夕披衣增慨慷千金空市骨三沐竟
刳腸世事麓能識吾生安用長布裘茆屋底死
去亦芬芳

十月十五夜對月

離海月盈丈寒光萬里明衆星斂欲盡一鏡獨

徐行重露滴松鬣高風吹鶴聲老來殊畏冷不
盡倚闌情

久疾

久疾無時已殘年莫更論流離魂未返窮困舌
空存畊壠關心事祠官荷主恩但愁垂老眼不
見定中原

又

殘年仍臥疾窗戶夜悄悄一日且復過久生非
所欽暗塵侵藥笥微月伴衣砧萬里懷良友前
盟可得尋

又

幽屏元無事沉緜自鮮歡脛長猶可截冠挂豈
容彈擣藥香塵細尋書蜜炬殘晚來差覺健風
月小庭寬

舍北望牛頭山山有延勝寺先太傅書堂
在焉六年前嘗泛小江往遊寺焚於睦寇

書堂無復存矣

太傅讀書處秋風曾問途江如青弋險山似白
鹽孤山形絕類夔府之路盡還登嶺林開忽見

湖艸堂無復識流涕想規模

十月十九日大風作寒閉戶竟日

霜風捲地起落葉擁蝸廬終日澹無事一窗寬
有餘坐多知力耗食少覺心虛嬾情無新句松
聲忽起予

寄天封明老

浪迹天台一夢中距今四十五秋風勝遊回首
似昨日衰病侵人成老翁聖寺參差石橋外仙
蓬縹緲玉霄東因君又動青鞵興目斷千峰翠
倚空

村居

衰病汗朝著恩寬得免歸麓能心自信不恨世
相違草市寒沽酒江城夜擣衣是中堪送老高

枕謝招麾

又

自笑觸藩羝人嘲失旦雞囊慳衣任短山冷屋
便低宦拙讒銷骨言狂悔噬臍自今焚筆研有
手但扶犁

十月下旬暄甚戲作小詩

老怯霜風盡日眠素屏紙帳擁蠻氊爲君小試
回春手便似暄妍二月天

霜天雜興

楓葉金丹榭葉黃江城殘角伴斜陽琴書自足
閑中樂天地能容醉後狂老死山林初不憾夢
遊河渭獨難忘穀城黃石今安在取履猶息効
子房

又

萬鼓風聲吼屋邊老人裘袴旋裝綿晨梳墮髮
知衰甚夜枕聞雞尚慨然身後文章空飽蠹眼

前交舊半沉泉飯蔬飲水平生慣恥向天公更
乞憐

又

少學愚公一味愚暮年仍似病相如閑吟寄友
惟生紙草具畱僧只野蔬雨澀溪流殊未足霜
高木葉已無餘潭州丞相憐衰疾細字時收尺
素書

連日風雨寒甚夜忽大風明日遂晴

萬里浮雲一掃空碧天無際日曛曛歡聲四起
春風裏恰似祥符景德中

懷管

管者戍梁益寢飯鞍馬間一日歲欲算揚鞭臨
散關增冰塞渭水飛雪暗岐山悵望釣璜公英
槩如可還挺劔刺乳虎血濺貂裘殷至今傳軍
中尚媿壯士顏豈知墮老境槁木蒙霜菅澤國
氣候晚仲冬雪猶慳曩事空夢想擁褐自笑孱

胡星未實地大弓何時彎

寄題王俊卿看山堂

廣文風度絕清真一代論交不數人
車馬到門常謝病北山雖遠却相親

又

閉戶終年嬾出遊北山山色可消愁
何時一掃胡塵盡更約同吟太華秋

絕歎

老屋環青嶂衰翁臥白頭殘書且遮眼
薄酒不澆愁世故真難料吾生愈覺浮
餘年更須惜幸得返山丘

風雨

風雨連三日衰翁不下堂弄書聊自適
與世已相忘坼栗經霜飽搓橙帶露香
地爐供小飲亦足慰淒涼

晚過鄰曲

陽狂跌宕送年華信步來尋野老家淺瀨水清
逢立鷺橫林葉盡數栖鴉書生一飽依耕耒壯
士孤愁入戍笳王績但息酣美醞葛洪不復問
丹砂

莫仲謙挽詞

懷器潛山澤逢時起薜蘿星辰占寶劔雷雨化
龍梭禹穴書雖富浯溪石未磨門閭更須築有
子繼三科

病起

一病輒經旬幾病能不死誠知迫頽年暫健亦
自喜半窗風竹影晴景極清美讀書雖益嬾尚
可日百紙引鏡整角巾病息真一洗悠然度朝
晡萬事如覆水

晚興

一聲天邊斷雁哀數盡籬外蚤梅開幽人耐冷
倚門久送月墮湖歸去來

贈粉鼻

畜貓各也

連夕狸奴磔鼠頻怒髯喫血護殘困問渠何似
朱門裏日飽魚殮睡錦茵

與兒輩論李杜韓柳文章偶成

吏部儀曹體不同拾遺供奉各家風未言看到
無同處看得同時已有功

夢至小益

夢覺空山淚漬衿西遊歲月苦駸駸葭萌古路

緣雲壁桔柏浮梁暗櫟林坐上新聲猶蜀伎道
傍逆旅已秦音荷戈意氣渾如昨自笑摧頽負
壯心

懷紹興間往還諸公

早歲從諸傑森然盡國華辭工出月脇筆健拔
鯨牙道在窮何憾年徂生有涯湖山元不改老
淚溼風沙

磨衲道衣

久脫朝衣學道裝溪雲坐鶴作身章何時九轉
丹砂熟却插金貂侍紫皇

溪上作

落日溪邊杖白頭破裘不補冷颼颼戇愚酷信
紙上語老病猶先天下憂末俗陵遲稀獨立斯
文崩壞欲橫流紹興人物嗟誰在空記當年接
俊遊

又

偃偻溪頭白髮翁暮年心事一枝筇山銜落日
青橫野鴉起平沙黑蔽空天下可憂非一事書
生無地効孤忠東山七月猶關念未忍沉浮酒
酸中

小憩

徐行散腰膂小憩畜精神休養觀書眼調娛宴
坐身青氈我家舊紅粟太倉陳溫飽無餘事寒
龜息自勻

癸丑十一月下旬溫燠如春晦日忽大風
作雪

今年一冬晴日多草木萌甲風氣和百錢布被
未議贖老翁曝背兒行歌吾儕小人慮不遠積
雪苦寒來豈晚青天方行三尺身不料黑雲高
巉巖明朝雪惡凍復餓兒啼頰皴翁噤臥九重
巍巍那得知閤門催班百官賀

占城櫻竹拄杖

參雲氣壓葛陂龍跨海來扶笠澤翁八十尙息
行脚在與君處處現神通

西城

市步羣囂散關門夕照明河流倒橋影雪野聚
鳥聲繁杵聞深巷寒煙下廢城匆匆舩盡發爭
趁早潮平

東城

墟落斂算煙林梢偃新月河橋燈漸開柳岸船

猶發薄酒吹欲無佇立搔短髮誰知七十翁歲
晚念裘褐

斯道

斯道有顯晦所憂非賤貧乾坤均一氣夷狄亦
吾人芻蕘消廷論鉏耰洗戰塵清時更何事處
處是堯民

病起山居日有幽事戲作

靈府超然外物輕靜中談笑却三彭晴窗風竹
參差影霜樹山禽格磔聲客出異苗咨藥品僧
攜竒篆乞書評幽居亦未全無事更用人間有
姓名

又

鶴骨龜腸欲不禁扶衰初喜罷呻吟盆山冰釋
書窗暝藥竈香濃道院深筆健乍臨新獲帖手
生重理舊傳琴閉門局促還堪恨雲海何時豁
此心

蝸廬

蝸廬四壁空也過百年中薪火朝供爨蘆綿夕
禦風不憎窮有崇自以放名翁但恨村醪薄衰
顏只斃紅

冬夜讀書有感

一指頭禪用不窮一刀七藥去凌空汗牛充棟
成何事堪笑迂儒錯用功

又

胸中十萬宿貔貅阜燾黃旗志未酬莫笑蓬窗
白頭客時來談笑取幽州

十二月九日枕上作

臥聽百舌語簾櫳已是新春不是冬堪歎老來
如許病正令無病亦無悰

記夢

黃河衮衮抱潼關蒼翠中條接華山城郭丘墟
人盡老藥爐依舊白雲間

又

西巖老宿雪垂肩白石爲糧四百年喜我未忘
山下路慙慙握手一欣然

又

三髻山童喜欲顛下山迎我拜溪邊松陰拂罷
蒼苔石接竹穿雲理舊泉

鏡湖女

湖中居人事舟楫家家以舟作生業女兒粧面
花樣紅小繖翻翻亂荷葉日暮歸來月色新菱
歌縹緲泛煙津到家更約西鄰女明日湖橋看
賽神



國家圖書館, NATIONAL CENTRAL LIBRARY, TAIWAN, R.O.C.

館刊	第二十八	卷

劔南詩彙目錄

卷第二十九

水村曲 石洞餉酒 病退 偶書 讀
史 飲石洞酒戲作 霜寒 賽神曲
涼州行 望夫石 江村道中書觸目
采蓮曲 兀坐頗念遊歷山水戲作 五
雜組首二 漁扉 詠史 烏棲曲 古別
離 書歎 十二月二十六夜聽雨 起

晚 陳少監餉澄清堂酒 雪中作 田

寅元日子七十矣酒間作短歌示子 七

十 正旦後一日 立春 老境 偶懷

小益南鄭之間悵然有賦 再用前韻不

依次 北坡梅開已久一株獨不著花立

春日忽放一枝戲作 人日 夜讀呂化

光文章拋盡愛功名之句戲作 遇術士

飲以卮酒 閒趣 正月二十日晨起弄

筆 春夜讀書 春晴泛湖入城 書空

壁 首二 春日睡起 老病謝客或者非之

戲作 永日無一事作詩自怡 窗前作

小土山蕤蘭及玉簪最後得香百合併種

之戲作 泛舟觀桃花 首五 新闢小園 首五

上巳小飲追憶乾道中嘗以是日病酒

畱三泉江月亭悽然有感 晚步門外散

懷 首二 欲出遇雨 飢坐戲詠 蔬食

山亭 久不得張漢州書 春晚村居

遊雲山諸蘭若 與子坦子聿遊明覺十

四韻 淨智西窗 小僧乞詩 西窗睡

起 平水 三月二十五夜達旦不能寐

二首 園中小飲 舟中夕望 四月一日

作 舟行過梅市 山園雜賦四首 西窗

山頭鹿 夏四月渴雨恐害布種代鄉

鄰作插秧歌 雲童童行 董逃行 閔

劔南詩彙卷第二十九

水村曲

山村今年晚禾旱奏下民租蠲太半水村雨足
米狼戾也放三分慰民意看榜歸來迭歌舞其
喜清平好官府老翁猶記軍興時汝輩少年那
得知

石洞餉酒

忘憂自古無上策欲飲家貧酒盃迨今朝鵲喜

報遠餉未坼赤泥先動色魚長三尺催膾玉巨
蟹兩螯仍斫雪勿言地僻少過從清風明月俱
吾客驅除二豎走三彭零落眼花生耳熱陶然
酣臥聽松聲媿爾公卿足憂責

病退

病退身仍健春回日漸長神訶金鼎藥龍出玉
函方美睡三竿日安禪半篆香殘年已如許幸
復起膏肓

偶書

身放江湖遠年推里巷尊隣翁分酒子羽客借
桐孫泱泱冰消澗纖纖柳映門小車非漢相時
亦到前村

讀史

南言尊菜似羊酪北說荔枝如石榴自古論人
多類此簡編千載判悠悠

飲石洞酒戲作

酣酣霞暈力通神澹澹鵝雛色可人一笑破除
垂老日滿懷搖蕩隔年春梅花的的吹初破楊
柳纖纖染未勻醉倒橋邊人不怪西曹免護相
君茵

霜寒

霜重晨簷滴新乾夜焙溫老惟便布褐病不出
柴門瓶裏梅花墮窗間鶻語喧閑人信無事午
睡到黃昏

賽神曲

擊鼓坎坎吹笙鳴綠袍槐簡立老巫紅衫繡
裙舞小姑身白燭明蠟不如鯉魚糝美出神厨
老巫前致詞小姑抱酒壺願神來享常驩娛使
我嘉穀收連車牛牟莫歸塞門閭雞鶩一母生
百雛歲歲賜粟年年蠲租蒲鞭不施園土空虛
束草作官但形模刻木爲吏無文書淳風復還
羲皇初繩亦不結況其餘神歸人散醉相扶夜

深歌舞官道隅

涼州行

涼州四面皆沙磧風吹沙平馬無迹東門侯張
接中使萬里朱宣布襖勅勅中墨色如未乾君
王心念兒郎寒當街謝恩拜舞罷萬歲聲上黃
雲端安西北庭皆郡縣四夷朝貢無征戰舊時
胡虜陷關中五丈原頭作邊面

望夫石

送君遠戍交河北男兒自以身許國不能彎弓
騎惡馬欲隨君去何由得登山矯首西北雲形
容雖變心猶存月明夜夜照淚痕鐵心石腸輸
與君

江村道中書觸目

短籬曲曲對開門脩竹陰陰不見村別浦回潮
魚滬密孤舟春近雁沙溫路逢行客時交轡店
賣新醅一舉樽忽過亂山幽絕處恍如白帝到

東屯

采蓮曲

采蓮吳姝巧笑倩小舟點破煙波面雙頭折得
欲有贈重重葉蓋羞人見女伴相邀拾翠羽歸
棹如飛那可許傾鬟障袖不磨人遙指石帆山
下雨

兀坐頗念遊歷山水戲作

萬里當時寄一官十年客枕不曾安鬼愁灘下

扁舟晚蛇退陂前古驛寒簷遠遊生雪鬢近

緣多病學金丹功名非復衰翁事獨有江山興

未闌鬼愁灘在安康漢江中蛇退陂在夔施雨郡之間皆畏途也然山水特奇

五雜組

五雜組山雉羽往復還江頭路不得已貴臣去

又

五雜組機上綺往復還冶遊子不得已富兒死

漁扉

湖上千峯翠作圍正應佳處著漁扉迂疎自計
難謀食老病誰令未拂衣萬里滄波鷗乍沒千
年華表鶴重歸一盂粟飯吾何恨自古高人有
采薇

詠史

夜雨燈前感慨深爲邦一士重千金風雲未展
康時略天地能知許國心匆匆挂頤都將相帽
曾摩耳隱山林英雄自古常如此君看隆中梁

甫吟

烏棲曲

楚王手自格猛獸七澤三江爲苑囿城門夜開
待獵蹄萬炬照空如白晝樂聲前後震百里樹
樹棲鳥盡驚起宮中美人謂將且髮澤口脂費
千萬樂聲早算少斷時莫怪棲鳥無穩枝

古別離

君北遊司并我南適熊湘邂逅淮陰市共飲官

金匱詩集 六
道傍丈夫各有懷窮達詎可量臨別一取醉浩
歌神激揚勲業有際會風雲正蒼茫亂點劔峯
血苦寒芒屢霜死卽萬鬼鄰生當致虞唐丹雞
不須盟我非兒女腸

書歎

夜深青燈耿窗扉老翁稚子窮相依齏鹽不給
脫粟飯布褐僅有懸鶉衣偶然得肉息笑飽吾
兒苦讓不忍違兒飢讀書到雞唱意雖甚壯氣
力微可憐落筆漸健快其奈瘦面無光輝布衣
儒生例骨立紈袴市兒皆瓠肥勿言學古徒自
困吾曹捨此將安歸作詩自寬亦慰汝吟罷撫
几頻歔歔

十二月二十六夜聽雨

新春尚七日小雨暗江城茆簷夜點滴已作春
雨聲輕黃上柳枝嫩綠抽菊萌造物本何心誰
主此發生頗疑重雲外斗杓已東傾老至不可

却一尊忘濁清

起晚

俯簷百舌語惚瓏已覺新春在眼中欲起未成
還小睡忽看初日滿窗紅

陳少監餉澄清堂酒

酣暢年來豈易逢壘湯蜜汁亦時中玉酪忽逐
春風至一吸懸知百榼空

雪中作

黑風卷地連三日密雪穿簾又一回衰病不禁
天色惡笑談誰共酒尊開忍寒瘦馬嘶空櫪覓
食飢鴉啄廢臺笑遣蠻童撼園竹輟羹分火待
歸來

甲寅元日子七十矣酒間作短歌示子

我管自蜀歸百年已過半觀棊未終局回視斧
柯爛飽知山林樂富貴何足換退休失健決正
坐闇且懦齒髮日衰殘歲月難把玩蕭朱尙或

隙籀湜固宜畔出門無一欣撫事有三歎新年
遂七十推敬媿里閤眷眷惓茲夕凜凜畏明日
豁然忽大笑愁若春冰泮寫達真兩忘生死付
一貫清尊既漱灑碩果亦璀璨擁門紛鼓笛上
壽列童冠老翁亦忘疲起舞影零亂不獨誇癡
頑自足洗患難投床判宿醒美睡到日旰

七十

七十殘年百念枯桑榆元不補東隅但存隱具
金鴉觜那夢朝衣玉鹿盧身世蠶眠將作繭形
容牛老已垂胡客來莫問先生處不釣娥江卽
鏡湖

正旦後一日

七十今年是連朝樂未休比鄰更頌禱親黨共
遲畱羊映紅纏酒花簪絳帕頭從今日有喜農
事起西疇絳帕頭蓋以絳
帛飾巾幘之類

立春

採花枝上寶旛新看遍秦山楚水春村舍不知
時節換傷檐百舌苦撩人

老境

髮白未及童齒搖未及脫正如一席飲燒燭將
見跋谿山環草舍霜露侵布褐文章雖自力亦
已強弩末寧將垂老耳更受世事聒匡廬入我
夢行已寄瓶鉢

偶懷小益南鄭之間悵然有賦

西戍梁州鬢未絲嶓山漾水幾題詩劔分蒼石

高皇迹

嶓冢廟傍有高皇
試劔石中分如截

巖擁朱門老子祠

道上有老君
洞景趣幽邃燒兔驛亭微雪夜騎驢棧路早梅

時登臨不用頻悽斷未死安知無後期

再用前韻不依次

憶昨從戎丞相府元瑜書檄仲宣詩雲屯騎士
臨邊日魚貫降胡獻捷時史冊誤人悲壯志關
河回首負初期豈知二紀身猶在衰鬢星星老

侍祠

北坡梅開已久一株獨不著花立春日忽
放一枝戲作

日日來尋坡上梅枯槎忽見一枝開廣寒宮裏
長生藥醫得冰魂雪魄回

人曰

新歲逢人日老夫持道齋斷冰浮野水微綠發
枯芽霽景豐年象今年元日至人日皆晴閑吟曠士懷春

旛已陳迹鬪巧笑吳娃

前一日立春

夜讀呂化光文章拋盡愛功名之句戲作
玉關西望氣橫秋肯信功名不自由却是文章
差得力至今知有呂衡州

遇術士飲以卮酒

行藥來村北觀魚立水邊忽逢長揖客能算小
行年酒薄聊頰頰囊空闕贈錢時清君未死訪
我華山前

閑趣

老子卽今雙白鬢鏡湖自古幾青山半窗蘿月
獨欹枕滿院松風常掩關天地許寬誰礙汝琴
尊是處可開顏將行亦莫買春草幸有一筇相
伴閑

正月二十日晨起弄筆

深院窗扉曉色遲新愁宿醉兩參差雨聲欲與
夢相入春意不隨人芙蓉零落殘梅臨小約縱
橫野水赴清池物華撩我緣何事以恐新年漸
廢詩

春夜讀書

枉是儒冠遇太平窮人那許芙蓉功名枯腸不飽
三升稷皓首猶親二尺檠寓世已爲當去客愛
書更付未來生夜闌撫几愁無奈起視離離斗
柄傾

春晴泛湖入城

春色初回杜若洲
隔煙時見矯輕鷗
嵩雲緜月年年夢
楚柁吳檣處處愁
魚躍銀刀論網買
酒傾綠蟻滿盃浮
前生杜牧吾身是
又向江南遍倚樓

書空壁

老病人扶氣力微
闌干西角立斜暉
流年冉冉功名誤
新冢纍纍故舊稀
仗馬曾鳴宜永棄
牧箠雖乳敢言歸
住菴活計無多子
只要筇枝與

衲衣

又

落魄人間不記年
晚營茆棟鏡湖邊
室空惟是四壁立
面瘦漸生雙頰顛
地僻門無殘客到
歲豐路有醉人眠
君看朝市紅塵開
始信吾曹是地仙

春日睡起

睡起悠然弄衲琴
銅猊半燼海南沉
淒涼故里

逢春處忠憤孤臣許國心水滿鳧鷖初拍拍雨
餘花木已陰陰吾兒振柂淮邊未歸近清愁轉

不禁

子虞書報
月離古詩

老病謝客或者非之戲作

病侵腰脊兩經秋欲下繩床不自由客至難令
三握髮佛來僅可小低頭安禪還我閑蒙衲怒
氣從渠勇挾輶亦欲署門還嬾去死生貴賤本
悠悠

永日無一事作詩自詒

目昏罷觀書足蹇停遊山二事差可樂造物乃
復慳得非閔我老作意鑄其頑埽除盡宿習使
得終日閑閑亦何負汝剡曲茆三間奇石玩犖
角清流聽淙潺勿言村醪薄數酌可解顏翛然
日已夕臥看飛鳥還

窗前作小土山莚蘭及玉簪最後得香百
合併種之戲作

方蘭移取徧中林餘地何妨種玉簪更乞兩鼓香百合老翁七十尚童心

泛舟觀桃花

花溼二月桃花發霞照波心錦裏山說與東風

直須惜莫吹一片落人間花溼桃花最盛處

又

桃源只在鏡湖中影落清波十里紅自別西川

海棠後初將爛醉畱春風自梅仙塢至花溼恰十里

又

種桃亦解比封君世故紛紛寂不聞九轉金丹應已熟全家仙去隱紅雲

又

湖南小山花更多不醉將如春色何釣得鮮鱗

堪斫膾任教微雨溼漁蓑湖南山名在柯山之南

又

鄰曲一生花裏活村翁疑是古遺民初來自被

春畱佳枉道當時爲避秦

新闢小園

人生如意每難全
草草園池却自然
世事已拋高枕外
春風常在短筇前
墮空花片紛紅雨
徧地苔痕長綠錢
酒戶漸增詩興在
天容此老藥狂顛

又

西戍歸來鬢已霜
生兒又過乃翁長
眼明身健

幾年足飯軟茶甘
萬事忘學廢僅能書姓字
客來嬾復倒衣裳
山園寂寂春將晚
酷愛幽花似蜜香

又

席地幕天君勿嘲
隨宜野蔌與山肴
幽花避日藏深葉
歸燕尋人理舊巢
曲水詠觴空念簪
斜川鄰曲自論交
清貧尙媿茶山在
送老湖邊有

把茆

曾文清至歿
常寓僧舍

新展山園半畝強笑人車馬出籠坊山禽乍暝
慇懃語野蘓無風自在香點點水紋迎細雨疎
疎籬影界斜陽出門遙向鄰翁說釋耒相從共
一觴

又

東軒嫩日上疏櫺吹盡浮雲作意晴林暝牆頭
雙鶴語水清池面小魚行畦添藥品誰能別架
引藤陰忽已成倚杖怡然便終日老夫那復不

十鳴

又

洞祿縻人未棄官春深幽國有餘歡荀生遮道
幼行藥果熟團枝礙整冠煮酒拆泥初灑灑生
新裁扇又團團退飛風際由來事莫羨青霄刷
羽翰

上巳小飲追憶乾道中嘗以是日病酒留
三泉江月亭悽然有感

零落殘花一兩枝綠陰庭院燕差池隔牆笑語
鞦韆散惆悵三泉驛裏時

元微之詩三泉驛內逢上已

晚步門外散懷

大千沙界一浮漚成壞元知不自由寓迹箇中
誰耐久問君底事不歸休春陂欲雨黃鴉鬧晚
渡無人白犢浮七十之年何啻足戲憑藥物小
遲留

又

萬化紛紛本一機不爲腐骨欲安歸彭殤莫盡
孰脩短堯桀兩忘無是非濡首極知當痛飲翦
翎那復許羣飛江郊未解春寒惡高柳吹花又
滿衣

欲出遇雨

東風吹雨惱遊人滿路新泥換細塵花睡柳眠
春自嬾誰知我更嬾於春

飢坐戲詠

衰鬢蕭然滿鏡霜一菴歸老鏡湖傍有懷每恨
交朋遠無食方知日月長落筆未妨詩袞袞閉
門猶喜氣揚揚晚來袖手蒲團穩笑喚兒童代
夜香

蔬食

今年徹底貧不復具一肉日高對空案腸鳴轉
車軸春齋忽已花老筍欲成竹平生飯蔬食至
此亦不足孰知讀書却少進忍飢對客談堯舜
但令此道麓有傳深山餓死吾何恨

山亭

風惡闌回雨天寒勒住花尋幽扶柳粟息倦倚
槎牙分韻僧吟苦爭碁客笑譁相逢仍草草歸
路竝山斜

久不得張漢州書

儘道三巴遠那無一紙書
盡辭自難記不是故人疎

春晚村居

一事元無可得忙
悠然半醉倚胡牀
牡丹枝上青春老
燕子聲中白日長
身世已如風六鷁
文章仍似閨黃楊
太平有象無人識
南陌東阡擣麩香

遊雲門諸蘭若

花過木陰合
溪雲生
暮涼牛行響
白水鷺下點
青秧古寺宛如管
樨松森已行
道傍松及三十年則僧輒伐去

復種小者予自幼歲至今已見三種矣

者年不下榻童子爲燒香

與子坦子聿遊
叨覺十四韻

我自何山來
覓路占樓鐘
聯翩兩葛巾
跌宕一短筇
深谷已曛黑
夕陽猶半峯
堂中千歲師
磊砢如古松
殘僧三四輩
斗粟各自舂
長廊久寂寞
香火亦闕供
頗聞在世時
一鉢制惡龍
時時出雷雨
百里常年豐
宿緣忽云盡
獻供無春農
餓鳥晨攫餃
飢鼠夜穿墉
而況我輩人
生世本

不逢胡不安汝分終年抗塵容靜觀興廢事可
洗芥蒂胸一笑下山去村場煙重重

淨智西窗

一窗新綠愜幽情袖手哦詩取次成牆外蜜蜂
來又去可憐終日太忙生

小僧乞詩

風前掩苒草吹香溪上霏微雨送涼萬里安西
無夢到却尋僧話破年光

西窗睡起

老便寂寂厭紛紛俗得禪房臥看雲夜宴怕逢
觥錄事秋山傭伴獵將軍餘年敢望十寒暑夙
習正須三沐熏斜日滿窗誰喚起數聲啼鳥隔
溪聞

平水

旅飯風埃小市傍却呼拄杖踏斜陽可憐陌上
離離草一種逢春各短長

三月二十五夜達旦不能寐

愁眼已無寐更堪衰病嬰蕭蕭窗竹影磔磔水
禽聲捶楚民方急煙塵虜未平一身那敢計雪
涕爲時傾

又

憂國心常折觀書眼欲枯百年終坎壈一飯且
枝梧忽忽殘春過迢迢清夜徂壯心空萬里老
病要人扶

園中小飲

此老胸中萬頃寬小園幽徑日追歡寧教酒欠
尋常債耻就人求本分官高柳陰濃煙欲暝
花紅溼露初溥時月桂方盛開要知澤國年光晚已過
清明尚淺寒

舟中夕望

船掠湖堤不入城葛巾羽扇試春行女牆迤邐
橫輕靄佛閣崢嶸倚晚晴樹冒藤花堆故繡風

吹鬢語送新聲細息造物何由報遣作閑人過
此生

四月一日作

桃李逢春次第開坐看零落付蒼苔壓車麥穗
黃雲重食葉蠶聲白雨來鏡裏頓驚年事速天
邊誰挽斗杓回可憐團扇塵侵損又見生綃月
樣裁

舟行過梅市

新換單衣細葛輕翛然隨處得閑行綠陰浦口
維舟處霽日場中打麥聲醉叟臥途知酒賤耕
農滿野喜時平老來無復雕龍思遇興新詩取
次成

山園雜賦

初夏未覺暑微陰殊勝晴藤冠稱新沐尊菜解
餘醒偶據盤陀坐還扶柳栗行平生志勛業今
日一毫輕

又

藤陰初覆架菱蔓漸穿萍水繞籬根綠山從樹
罅青長辭帝所夢不媿草堂靈賴有黃醅法終
年任醉醒

又

一日老一日一年貧一年元無肉食相且作地
行仙本不營三窟何須直一錢村虛櫻筍開剗
放醉中顛

又

芳荃真妙士霜菊亦奇才邂逅心生敬慙懃手
自培扶持新長桂護惜欲殘梅此意何人解頽
然付酒盃

西窗

西窗偏受夕陽明好事能來慰此情看畫客無
寒具手論書僧有折釵評薑宜山茗畱閑啜豉
下湖尊喜共烹酒彀朱門非我事諸君小住聽

松聲

山頭鹿

呦呦山頭鹿毛角自媚好渴飲澗底泉飢齧林
間草漢家方和親將軍灞陵老天寒弓力勁木
落霜氣早短衣日馳射逐鹿應弦倒金槃犀筋
命有繫翠壁蒼崖迹如埽何時詔下北擊胡却
起將軍遠征討泉甘草茂上林中使我母子常
相保

夏四月渴雨恐害布種代鄉鄰作插秧歌
浸種二月初插秧四月中小舟載秧把往來疾
於鴻吳鹽雪花白村酒粥面濃長歌相贈會宛
轉含幽風日暮飛漿歸小市鼓鼕鼕起居問尊
老勤儉教兒童何人采此謠爲我告相公不必
賜民租但願常年豐

雲童童行

雲童童挾雨來雨未濡土雲已開不能爲人歛

浮埃山南山北空聞雷青秧欲槁吁可哀

董逃行

讀古樂府擬作

漢末盜賊如牛毛千戈萬槊更相鏖兩都宮殿
摩雲高坐見霜露生蓬蒿渠魁赫赫起臨洮僵
屍自照臍中膏危難繼作如崩濤王朝荒穢誰
復薈踰城散走墜空壕扶老將幼山中號咷者
羣枉根株牢衆憤不能損秋毫誰知此亂亦不
遭名雖放斥實遁逃平民踏死聲磬磬今茲受

禍乃我曹

閔雨

黃沙白霧晝常昏嗣歲豐凶詎易論寂寂不聞
秧鼓動啞啞實厭水車翻粟困久盡無遺粒淚
席嘗沾有舊痕聞道憂民又傳詔蒼生何以報

君恩

有詔禱雨
天竺山

又

赤日黃塵江上村徵租惟有吏過門微風敢喜

北窗臥大旱恐非東海寬千載傳巖疑可致一篇
洪範向誰論青蔬半畝垂生死且喚鄰翁共
灌園

喜雨

楚巫犇走畏天慳變化寧知轉盼間初夜電光
搖北斗父老以此斗下有電候雨平明雲氣冒南山坐令沃
野新秧遍已覺豐年舊觀還白首老農愁破處
夢回高枕聽潺潺

初夏

已作梅黃雨猶餘麥秀寒穿林紅練帶拔地碧
琅玕酒向愁邊薄衣從病後寬所欣消渴減乳
酪正甘酸

村舍

門巷桑麻暗庖厨筍豉香僮奴課鉏菜婢子學
燒糠貧任青春過閑知白日長非關愛疎嬾無
事可成忙

鳥啼

野人無曆日鳥啼知四時二月聞子規春畊不
可遲三月聞黃鸝幼婦閔蠶飢四月鳴布穀家
家蠶上簇五月鳴鴉舅苗稚憂草茂人言農家
苦望晴復望雨樂處誰得知生不識官府葛衫
麥飢有卽休湖橋小市酒如油夜夜扶歸常爛
醉不怕行逢灞陵尉

感舊

廢隴荒陂浥浥畊生無勛業死無名衰頹日甚

君休問三十年前白髮生

紹興壬午予年三十
八與查元章王嘉叟

同出垂拱殿門二君指予問曰子亦
有白髮耶相與太息今三十二年矣

讀書至夜半燈盡欲睡慨然有感

白髮蕭蕭老空谷人歎厄窮心自足東郊曉射
墮錦雉止崦春畊叱黃犢區區世事何足論未
死斷知常閉門關河好在松萬里路理亂不至三
家村夜分燈暗月入戶賦詩肯道儒冠誤飢鷹

勁翮高有聲橫截陂湖正南去

遣興

壯歲元多病長年敢自期賤貧交易絕憂患夢
常悲續食叨微祿寬心賴小兒平生鏡湖上天
乞小茆茨

農舍

農舍雖云苦君恩詎可忘繭稠初滿簇麥熟已
登場渺渺開村路登登築野塘但須時雨足擊

壤詠時康

四月晦日小雨

霏霏亂點暗朝光
蔌蔌奇聲渡野塘
一浦未輸新漲綠
四郊聊壓早塵黃
風生團扇清無暑
衣覆熏籠潤有香
竹屋茆簷得奇趣
不須殿閣詠微涼

泛舟過吉澤

蕭蕭菰蒲如荻林
五月已覺秋意深
煙波滅沒

初月詩集

有漁艇浦溆飛鳴多水禽稽山出雲極奇變陸
子岸幘方微吟一聲菱唱起何許洗盡萬里功
名心

書歎

高廟衣冠月出遊中原父老淚交流諸公誰効
回天力散吏空懷恤緯憂雨細漁菴晨舉網月
明畊隴夜驅牛神州克復知何日北望飛蓬萬
里秋

五月得雨稻苗盡立

城郭迎龍鼓吹喧甘膏三夕慰黎元草荒常日
經行路水到前村舊漲痕黃犢盡畊稀曠土綠
苗無際接旁村家家足食山無盜安枕何勞夜
閉門

薄醉遣懷

跼踖蝸廬迳蕭條鶴髮新途窮貧入夢身老病
欺人帶索忘三組羹藜抵八珍蓬窗一盃酒自

劔南詩彙目錄

卷第三十

五月十一日夜坐達旦 題陽關圖 新

暑書事 時雨 示客 南堂默坐 夏

日 小酌 夏夜二首 看鏡二首 明妃曲

思遠遊 太息 六月二十六日夜夢

赴季長招飲 夜分不寐起坐園中至旦

露坐 晨起 散步東邨 早秋四首

NATIONAL CENTRAL LIBRARY, TAIWAN, R.O.C.

七月二十一日午睡夢泛江風濤甚壯覺

而有賦 幽居戲贈鄰曲 遣興首二 步

至湖上寓小舟還舍首五 送王仲言倅秦

州絕句首二 醉中作 秋夜書感 八月

三日驟涼有感 南堂與兒輩夜坐 泛

舟至魯墟 園蔬薦村酒戲作 雨夕排

悶首二 雨中作 讀易 郊行夜歸有感

醉歌 買酒 秋雨歎 憂國 夜意

大風雨中作 題壘壁首二 窮途 貧

病 秋晚首四 山村書所見首二 三年前

嘗與兒輩步過東涇小嶺得勝處可營別

墅貧不能成偶復至其地悵然有感 園

中秋夕 秋晴每至園中輒抵算戲示兒

子 醉睡初覺偶作 汪茂南提舉挽詞

首二 謝徐居厚汪叔潛攜酒見訪 喜鄭

唐老相遇 秋晚散步門外 寄徐秀才

斯遠并呈莊賢良器之 閒中 秋霽

晨起 筮篋謠二首寄季長少卿 悶極

有作 自詠 夢范參政 乞奉祠未報

食且不繼 山寺 大師魏國史公挽歌

詞首五 三峽歌首九 十月三日泛舟湖中

作 早行 晚泊 遣懷 舟行戲書

劍南詩彙目錄卷三終

劍南詩彙卷第三十

五月十一日夜坐達旦

莫笑耽書不計年寒儒業定幾生前讀經今日

韋編絕作賦當時鐵硯穿公路晚悲身至此令

威歸歎塚纍然三更聽雨蓬窗底又作鰥魚夜

不眠

題陽關圖

誰畫陽關贈別詩斷腸如在渭橋時荒城孤驛

夢千里遠水斜陽天四坐青史功名常蹭蹬白
頭襟抱足非離山河未復胡塵暗一寸孤愁只
自知

新暑書事

城中五月汗霑衣吾愛吾廬喜氣微珍簟含風
來遠餉輕羅疊雪出鳴機艾人當戶佳時過筒
黍堆盤舊俗非漫欲題詩還嬾去老來百事與
心違去歲葉正則餉新簟得以禦暑今年替職事僅得五六分遂辦暑服

時雨

時雨及芒種四野皆插秧家家麥飯美處處菱
歌長老我成惰農永日付竹床衰髮短不櫛愛
此一雨涼庭木集奇聲架藤發幽香鬢衣溼不
去勸我持一觴卽今幸無事際海皆農桑野老
固不窮擊壤歌虞唐

示客

桑柘成陰百草香縑車聲裏午風涼客來莫說

人間事且共山林夏日長

南堂默坐

日日樹頭鴨鵝鳴
夜夜谿邊姑惡聲
堂中老子獨無語
寂然似可終吾生
大鵬一舉九萬程
下視海內徒營營
秋蟲春鳥非我類
何至伴渠鳴不平

夏日

燕子生雛梅子黃
斷雲殘雨過林塘
孤舟正作簪簪夢
九陌難隨襍襪忙
團扇興來閑弄筆
寒泉灑罷獨焚香
太平處處熏風好
不獨宮中愛日長

小酌

白髮蕭然海上村
猶能草草置清樽
今年項里楊梅熟
綠李來禽不足言

夏夜

露溼芙蓉冷月明
簷蔔香殘醉吹欲
無颼颼髮

根涼豈惟棄世事形影亦相忘空憶南山下新
秋射虎場

又

我嘗在南鄭夜過東駱谷平川月如霜萬馬皆
露宿息從六月師關輔談笑復那知二十年秋
風枯苜蓿

看鏡

凋盡朱顏白盡頭神仙富貴兩悠悠胡塵遮斷

陽關路空聽琵琶奏石州

又

七十衰翁臥故山鏡中無復舊朱顏一聯輕甲

流塵積不爲君王戍玉關

馬正惠公喜功名每
日幸未甚衰若有邊

警願預征行得良馬
數疋輕甲一聯足矣

明妃曲

漢家和親成故事萬里風塵妾何辜掖庭終有
一人行敢道君王棄蕉萃雙駝駕車夷樂悲公

卿誰悟和戎非蒲桃宮中顏色慘雞鹿塞外行人稀沙磧茫茫天四圍一片雲生雪卽飛太古以來無寸草俗問春從何處歸

思遠遊

我志日已衰詩亦無傑句正如隨翅鶴悵望遠海路雖云須藥物幸未迫霜露裂裳裹兩踵此詩亦已屢嗟峨青城雲慘淡蟠冢樹秋風吹短裘萬里入芒屨

太息

太息重太息吾生誰與歸那知算景迫但覺故人稀避旤歸猶困憂讒默亦非今年貧徹底擬賣舊漁磯

六月二十六日夜夢赴季長招飲

少城駿馬逐春風二十年間萬事空清夢都忘雙鬢改繡筵還喜一尊同烏巾掩冉簪花重羯鼓敲鏗列炬紅安得此歡真入眼碧油幢擁主

人翁

夜分不寐起坐園中至早

涼氣蘇衰疾幽情入杖藜
月驚孤鶴起天帶衆星西
松菊今彭澤山川古會稽
清吟殊未愜喔喔已晨雞

露坐

此手乃可憐經月不把酒
著書又苦晚何以圖不朽
空庭坐三夏磊落垂北斗
向來歷關河萬里空回首
豈知三十年竟作越中叟
後生雖滿眼非復舊交友
形體迫衰謝妻子亦何有
悵望懷古人吞聲死農畝

晨起

心安已到無心處病去渾如未病前
晨起更知秋色好一庭風露聽鳴蟬

散步東邨

偶從北嶠繚東崗曳杖行歌踏夕陽
一徑入雲

多鹿跡數家臨水共漁梁
埜風蕭瑟知穉早社
酒淋漓喜歲穰鄰曲不須憐
老憊尚能尋句會
年光

早秋

涼颼浙浙撼庭柯微雨蕭蕭集浦荷
艸閣檐虛覺山近蓬窗地迳得香多
謀身自拙窮無鬼閉戶長閑睡有魔
臺省諸公盛冠劔固應老子得婆娑

又

秋入房櫳夜漸長紗厨笛簟怯新涼
螢光得意穿簾隙桐葉知時拂井牀
世事本來誰得鹿人生何處不亡羊
燈前笑向吾兒說又過銅匱半篆香

又

落魄巴江號放翁斯名歲晚亦成空
酒醒遙夜孤舟雨睡美清秋一榻風
駭浪千重無處地神

丹九轉有新功雲端不遇飛仙過誰顧幽人寂
莫中

又

貂裘塵土憶東周瓜隴風霜隱故侯嬾似老雞
頻失旦衰如蠹葉早知秋壺觴非復平生友歲
月空添客子愁病起筆端猶健在未妨揮灑賦
登樓

七月二十一日午睡夢泛江風濤甚壯覺

而有賦

夢中不記適何邦風飽蒲颿入大江久矣眼中
無此快蹴天雪浪濺船窗

幽居戲贈鄰曲

暮年遠屏天所僭落佩倒冠如得謝雖無壺酒
助歌呼幸有蠹書供枕藉市聲不聞耳差靜車
轍埽空身轉暇雨慳葵葉未吐甲露重榭房初
坼罅淡紅菱角密覆水爛紫蒲桃重垂架直令

劍南詩集 八
掩關避世俗未害煎茶喚鄰舍蕭蕭雞犬衡門
晚寂寂燈火幽窗夜勸君切勿縱高談性命如
絲不禁嚇

遣興

失馬真成福移山未必愚故園三徑廢餘俸一
錢無望道心常渴觀書眼欲枯宦遊歸自好不
必爲尊鱸

又

療飢惟恃粥動步已須人欲午猶支枕經旬不
過鄰鵲棲寒自穩鷗沒遠難馴莫笑謀身拙黃
冠學季真

步至湖上寓小舟還舍

淒涼懷古地慘澹算秋天紅樹秦馳道青山禹
廟壩湖風飄斷角墟日起孤煙老恨功名晚無
人共著鞭

又

山居苦無事攜杖出門行酒賤逢人醉農閑到
處耕巷牛聽晚笛池鷺唼枯萍東望生秋興樓
臺壓繚城

又

病墮支離境閑尋漫浪遊湖平天鏡曉山峭石
帆秋賒酒家家許看花處處畱歸途倦扶杖却
上釣魚舟

又

萬壑爭流地身閑得縱觀未能容蟹舍聊得寄
漁竿遠浦樵風急空山窅石寒踟躕不知晚磔
磔有歸翰

又

細浪隨搖櫂新涼入岸巾斷行初到雁空擔算
歸人漫道貧非病誰知嬾是真疎鐘起詩思迢
遞度煙津

送王仲言倅泰州絕句

汝陰太史萬籤藏酸棗先生六世芳豹尾屬車
晁景迂與先太史有海陵酬唱
畱不住却尋陳迹海陵倉

又

紫薇傑作傳千載物色分畱待下車老病難陪

曳裾客因來時寄一行書

劉貢甫嘗為泰倅

醉中作

舴艋爲家雲作友流年盡付樽中酒清獻穿林
鸞鳳吟草書落紙龍蛇走人間無復王景略千

載風雲常寂寞安得熊羆十萬師蹴踏幽并洗
河洛

秋夜書感

關干斗插西慘淡河絡角開歲財屬爾草木忽
搖落平生歷畏塗赤手犯蛟鱓幸收垂盡日歸
臥一丘壑鄉鄰怪此老骯髒尙如昨使無湖海
寬朝市何處著諸公方袞袞一士要諤諤謀食
古所羞終身美藜藿

八月三日驟涼有感

殘暑侵人畏汗霑
清秋乍見月纖纖
自燒熟火添香獸
旋把寒泉注硯蟾
佳客誤占螢入戶
遠書空喜鵲鳴簷
悠然獨對清燈臥
誰念柴門老病兼

俗以螢飛入室為有客至之兆

南堂與兒輩夜坐

殘暑初歸肺病蘇
胡床清夜集前除
風高木葉危將脫
月上天河淡欲無
鵲影繞枝棲未穩
荷

盤擎露重相扶淒
然又起流年感
兩鬢如蓬川夜枯

泛舟至魯墟

南蕩東陂弄夕霏
葛巾鶴氅試秋衣
纖纖新月迎船出
兩兩珍禽背水飛
病思漸蘇開酒戒
宦情已絕謝塵鞿
郊居是處堪樂興
不怕城笳苦喚歸

園蔬薦村酒戲作

身入今年老囊從早歲空元無擊鮮事常作啜
醜翁菹有秋菰白羹惟野蕘紅何人萬錢筋一
笑對西風

雨夕排悶

買牛耕剡曲舉世笑迂疎流落愈憂國衰殘猶
讀書滔滔安稅駕耿耿獨愁余破屋秋多雨情
懷用底攄

又

煙雨暗郊墟頽然臥草廬蟲喧夢回枕燈伴讀
殘書短褐頻關念荒畦久廢鋤更堪湖水漲累
日食無魚

湖水泛則
魚不可捕

雨中作

社瓮醅香燕子歸陰風吹雨暗郊扉疏溝園叟
方攜銀采藥蠻童已溼衣山雉尾垂衝靄去水
雞翅重蹋波飛憑闌一笑君知否肺渴秋來勢
漸微

讀易

揖遜干戈兩不知巢居穴處各熙熙無端鑿破
乾坤祕禍始羲皇一畫時

郊行夜歸有感

小市歌呼散幽人悄獨行斷鴻沙際冷重露草
根明信古癡常絕酬恩命本輕還家掩屏臥衰
涕浩縱橫

醉歌

三十六策醉特奇竹林諸公端可師秋風蕭蕭
吹鬢絲蟹螯正可左手持醉倒村路兒扶歸
兒不識問是誰浩歌起舞夜何其北斗磊落
河移貴人偕醉渠自癡黃金絡馬誇市兒一朝
禍來莫支持新州如山不可移

買酒

放翁病起不禁愁買酒看山自獻酬八月吳中
未搖落誰令衰鬢早知秋

秋雨歎

淙淙雨聲瀉高秋稻梁浸瀾雨不休志士仁人
萬行淚孤臣孽子無窮憂一身窮困未暇恤如
此無事理有不聖言古訓舉不驗簡編可用汗
馬牛嗚呼有粟吾得食夜睡何時得安席我生
猶及宣和年建炎以來身所歷高皇一言感天
地盜賊千羣埽無迹疽囊雖慘固可醫誰爲聖
代施鍼石

憂國

恩許還山已六年誓憑耕稼餞華顛養心雖若
冰將釋憂國猶虞火未然議論孰能忘忌諱人
材正要越拘攣羣公亦采芻蕘否貞觀開元在
目前

夜意

居家元是客在俗亦如僧點滴檐間雨青熒帳
外燈壯心終蹭蹬去日捷飛騰不及寒沙雁來

時下杜陵

大風雨中作

甲寅八月二十三日夜

風如拔山怒雨如決河傾屋漏不可支窗戶俱
有聲烏鳶墮地死雞犬噤不鳴老病無避處起
坐徒歎驚三年稼如雲一旦敗垂成夫豈或使
之憂乃及躬耕鄰曲無人色婦子淚縱橫且抽
架上書洪範推五行

題三壁

閑門無事不勝閑心境超然一室寬香岫火深
生細靄硯池風過起微瀾睡餘但欲依書几坐
久還思弄釣竿擾擾平生底事鏡湖歸隱老
黃冠

又

手斲雲根結草廬平生心事滿無餘二升菰米
晨炊飯一椀松燈夜讀書天理直須閑處看人
謀常向巧中疎煙波有趣君知否裂網伸釣也

得魚

窮途

窮途多感概老境少知聞酒裏閑消日書中自
策勲全軀希碌碌埽軌厭紛紛每愧吾鄉老頭
童念致君先友傳公給事其年髮髯每酒
酣脫幘覽鏡歎曰吾其已乎

貧病

行年七十尚攜鉏貧悴還如日紵初好事鄰僧
勤送米過門谿友強畱魚客來旋過牆頭酒睡

起閑抽架上書要信榮枯元不動胃中浩浩著
空虛

秋晚

春粳入甑香炊玉壓酒鳴槽滴碎珠甲第朱門
漫豪侈山家風味定應無

又

新築場如鏡面平家家歡喜賀秋成老來嬾惰
慚丁壯美睡中聞打稻聲

又

秋菰出水白於王寒薺繞牆甘若飴正是長
豈不可凜然大節固難移

又

竹竿坡面老別駕飯顆山頭瘦拾遺自古詩人
例如此放翁窮死未須悲

山村書所見

老枳垂藤晝常黑雛鷹聲作嬰兒啼伐薪歸來

遇急雨石路下山如踏梯

又

荒坡茫茫牧牛童扳角上背捷如風腰間一枝
搯枯竹橫吹短笛過村東

三年前與兒輩步過東涇小嶺得勝上可
營別墅貧不能成偶復至其地悵然有感

前年度嶺踏斜陽曾十松陰置草堂只倚氣吞
雲夢澤竟無錢買雪堆莊煙脂菱角空頻摘火

齊楊梅已再嘗事不如心居十九往來常羨捕

魚郎

山多楊梅有合抱者
下臨鏡湖皆菱蕩

園中秋夕

季秋哉生明風露正淒冷放翁澹無事樂此清
夜永飢鷹棲不穩勁翅起東嶺湖邊千樹柳何
處寄幽影人生寓宇內俯仰一炊頃此心無媿
負簞食均五鼎許身輩稷禹終亦輸箕穎天風
倘可乘采蓮登玉井

秋晴每至園中輒抵算戲示兒子

老翁七十如童兒置書不觀事遊嬉園中壘瓦
強名塲庭下埋盆聊作池青蒲紅蓼共掩映病
棕瘦竹相扶持衰頹已作老驥臥來往尚如黃
犢馳但知身存百無害莫問老健能幾時汝勤
挾筴乃堪笑且共飯豆羹秋葵

醉睡初覺偶作

小圃醒還醉幽窗起復眠虛明炷香地清潤斲

花天老去才雖盡窮來志益堅阿瞞那可語平
日笑橋玄

汪茂南提舉挽詞

學已三冬富書猶萬卷藏名場雖蹭蹬朝論極
揄揚小試襦袴詠遂辭鵷鷺行秋風九原路挽
鐸倍淒涼

又

往者紹興末江淮聞戰輦上流煩舊德下客辱

深知陳迹成今古追懷每涕洟郎君雖不識撫

事亦增悲

先相公督師荆襄游首蒙招
致幕府會畱樞屬不克行

謝徐居厚汪叔潛攜酒見訪

我雖生亂離猶及見前輩衣冠方南犇文獻往
往在幸僕埽灑役迹忝諸生內話言猶在耳造
次敢不佩殘年趨死近孤學與時背妄出更何
求終老事耕耒史君稽古學力大障橫潰廣文
亦偉士名字震當代同舟肯過我凜與前脩配

憂時抱忠鯁論事極慷慨嗟予雖益衰耳目幸
未廢何當卜鄰牆早莫聆警欬

喜鄭唐老相過

鄭子有書癖對書百事忘頭亂不暇櫛鬻冷不
暇嘗持此金石心力求古文章吟哦屈宋作蚤
夜聲琅琅方揮却日戈恥窺及肩牆不見今六
年所得非復常扁舟夜過我劇論神激揚徐出
二三篇稊米於太倉已足起衰懦黑絲生鬢霜
使得盡見之殆可鍼膏肓願子繼目今勿憺傾
錦囊因來數爲寄歲晚慰所望

秋晚散步門外

粟里歸栽菊青門隱賣瓜羸軀病天色衰鬢怯
年華野曠鳥聲樂溪清雁影斜門前秋潦退也

擬築堤沙

潦水壞道數丈方
與鄰曲共修之

寄徐秀才斯遠并呈莊賢良器之

徐子作別十年餘無人可寄一紙書閉門美睡

畏剝啄自怪一念常關渠西風蕭蕭吹槁葉秋
光正滿蝸牛廬讀書易倦出無友撫几恹恍空
愁予蜀莊之孫住南郭亦復迹遠非情疎何時
同載過老子共飯赤米羹青蔬

閑中

閑中高趣傲羲皇身臥維摩示病床活眼硯凹
宜墨色長毫甌小聚茶香門無客至惟風月案
有書存但老莊問我東歸今幾日坐看庭樹六

番黃

秋霽

驅除雲霧極知難敢意天公不作慳汛掃中庭
待明月攀躋危榭望青山取琴理曲茶煙畔看
鶴梳翎竹影間不爲新晴宜著句擬將幽事破
除閑

晨起

晨起梳頭拂面絲行年七十豈前期此生猶著

幾兩屐長日惟消一局碁空釜生魚忍貧慣閑
門羅雀與秋空區區名義真當勉正是先師戒
得時

筌篋謠二首寄季長少卿

庭樹非不榮霜實萬葉枯朋友豈我棄漸遠勢
自疎中夜起太息發篋覓舊書塵昏蠹蝕損行
缺字欲無一讀色已變再讀涕淚濡卷書置篋
中寧使飽蠹魚

又

少壯離別時回顧日月長會合終有期何恨天
一方我齒如敗屐君髮如新霜餘日復幾何萬
里遙相望欲泣老無淚欲夢不可常寄書何時
到江漢春茫茫

悶極有作

貴已不如賤狂應又勝癡新寒壓酒夜微雨種
花時堂下藤成架門邊枳作籬老人無日課有

興卽題詩

自詠

常記當年入洛初，華燈百萬擲樗蒲。平生得意薄
刀筆，吏投老身爲山澤臞。已罷向空書咄咄，尙
能擊缶和嗚嗚。今朝客至無尋處，正伴園丁斲
芋區。

夢范參政

中不知何歲月，長亭慘淡天飛雪。酒肉如山
鼓吹喧車馬，結束有行色。我起持公不得語，但
道不料今遽別。平生故人端有幾，長號頓足淚
迸血。生存相別尙如此，何況一旦泉壤隔。欲懷
雞黍病爲重，千里關河阻。臨穴速死從公尙，何
憾眼中寧復見。此傑青燈耿耿山雨寒，援筆詩
成心欲裂。

乞奉祠未報食且不繼

富貴常求繫日繩，阨窮却羨棄家僧。強顏始覺

貧爲害對鏡方嗟老可憎出戶風霜欺短褐讀
書父子共昏燈聖師夢奠二千載一卷遺言終
可憑

山寺

信步得佳寺入門吹斷香林深栗鼠健屋老瓦
松長吊古增悽愴憑高寄慨慷忽忽與未盡新
月映方塘

太師魏國史公挽歌詞

早擅淵源學常懷懇款忠雲龍際千載典冊冠
三公論諫寧中止謀謨不苟同此心誰復識志
士泣秋風

又

位歷公卿貴身兼將相榮珥貂儀一品錫帶價
連城入告推忠厚躬行本志誠斯民何以報萬
里徧春畊

又

道德補天石勛勞夾日龍犯顏無不盡造膝畧
皆從歲貢來戎幣秋防滅塞烽画圖麟閣上猶
足折遐衝

又

舊弼初收召惟公力贊揚都亭移侯帳全魏徹
封疆大度寧猜阻羣言自中傷拳拳虛左意猶
可質穹蒼公初援附卽力薦張忠獻公于壽王
如賜館都亭驛超封魏國公皆公密
奏且嘗乞用張公
爲首相而已佐之

又

壠干勞久成大將未班師共議回天意忘身爲
聖時人心嶮莫測時事遠難知汗簡方傳信孤
生欲語誰吳璘戍德順軍師老欲還不敢自請
公爲相登其情卽力請班師西鄙賴
以無事後議者乃指
公爲棄地公不辨也

三峽歌

乾道庚寅予始入蜀上下三峽屢矣後
二十五年歸畊山陰偶讀梁簡文巴東

三峽歌感之擬作九首實紹熙甲寅十月二日也

神女廟前秋月明黃牛峽裏算猿聲危途性命不容恤百丈牽船侵夜行

又

不怕灘如竹節稠新灘已過可無憂古粧峩峩一尺髻木盃銀盃邀客舟

又

十二巫山見九峯船頭彩翠滿秋空朝雲暮雨渾虛語一夜猿啼明月中

又

錦繡樓前看賣花麝香山下摘新茶長安卿相多憂畏老向夔州不用嗟

又

險詐沾沾不媿天交情回首薄如煙東遊萬里雖堪樂灩澦瞿唐要放船

又

蠻江水碧瘴花紅
白舫黃旗無便風
涪萬四時常避水
棚居高出亂雲中

又

亂插山花簪子紅
蠻歌相和灤西東
忽然四散不知處
踏月捫蘿歸峒中

又

萬州溪西花柳多
四鄰相應竹枝歌
問君今夕

不痛飲奈此滿川明月何

又

我遊南賓春暮時
蜀船曾繫挂猿枝
雲迷江岸屈原塢
花落空山夏禹祠

十月三日泛舟湖中作

桑落可釀酒艸枯可呼鷹
平生當此時意氣十倍增
卽今境界別下錢買短篷
鏡湖三百里往來寒日中小
甌炊彫胡玉食無此美
臥聞水鳥

聲世念去如洗知此恨太晚享此恐不足南山
忽已昏更就漁村宿

早行

寒漏參差斷晨雞次第鳴匆匆半枕夢草草一
盃羹澤國多逢雨閑人不計程雲間出寸埕迎
我有餘情

晚泊

樓上嗚嗚角橋邊點點燈聚沙新到雁趁渡獨

歸僧日隱山光暗天抵海氣蒸居人笑老子醉
髮亂鬢髻

遣懷

算年世事轉悠悠攬涕悽然類楚囚不道渾無
排遣處病觀周易悶梳頭

舟行戲書

世事無窮膏火煎羈魂病骨久羸然覺時不及
夢差樂死去始嗟生可憐慷慨知非請纓日推

移忽及挂冠年揚帆海浦差強意臥看秋濤蹴
遠天

劍南詩彙卷第三十

劔南詩彙目錄

卷第三十一

久雨 偶得長魚巨蟹命酒小飲蓋久無

此舉也 泛舟湖山間有感 望永思陵

二首 糟蟹 霜夜 三首 書室明煖終日婆

娑其間倦則扶杖至小園戲作長句 二首

初冬 買屐 十月晦日作 贈道友 五首

示子聿 老境 予所居三山在鏡湖



上近取舍東坡一畝種花數十株彊名小

園因戲作長句 被命再領沖佑有感

冬夜戲書首三 幽居首二 送蘇召叟秀才

入蜀効宛陵先生體 寄題哲上人漫堂

冬夜獨酌 夜坐燈滅戲作 艾如張

上之回 雜詠園中菓子首四 閉戶首二

連日大寒夜坐復苦飢戲作短歌 園

中對酒作 孝宗皇帝挽詞詞三 小兒入

城 夜坐首二 縱筆首五 郊行夜歸書觸

目 閉戶 十一月五日夜半偶作 晴

和出遊湖山間 病息 寄子虞 紙閣

午睡首二 夜分復起讀書 効蜀人煎茶

戲作長句 書逆旅壁 懶趣 閒中富

貴首二 書近況寄蜀中道舊 醉中自贈

明日自和 雪中至近村 歲暮感懷

以餘年諒無幾休日愴已迫為韻首十 桐

江哲上人以端硯遺子聿纔寸餘而質甚

奇天將雨輒先流泚予為效宛陵先生體

作詩一首 立春前三日作 贈應秀才

春耕 首春連陰 夜坐 新春 得

季長書追懷南鄭幕府慨然有作 正月

十一日夜夢與亡友譚德稱相遇於成都

小東門外既覺慨然有作 送陳吏部還

朝 觀碁 春行 雨霽春色粲然喜而

有賦 幽思 贈持鉢道人 柳首二 山

園雜詠 首五



劍南詩彙卷第三十一



久雨

黃葉雨中盡飢鴻
煙際來時艱歲仍惡身死病
相催西埭無行路
南山有疾雷囊空罷沽酒一
醉轉悠哉

偶得長魚巨蟹命
酒小飲益久無此舉也
老生日日困鹽齏
異味櫻魚與楮鷄
敢望槎頭分縮項
況當霜後得團臍
堪憐妄出綠香餌
尚

想橫行向艸泥東崦夜來梅已動一樽芳醞徑
須攜

泛舟湖山間有感

我似人間不繫舟好風好月亦閑遊歸來華表
千年鶴滅沒煙波萬里鷗歲晚客貂那復歎時
艱婺緯未忘憂野人只欲安耕釣江左夷吾可
見不

望永思陵

綠衣迎拜屬車塵艸木曾霑雨露春三十五年
身未死却爲天下最窮人

又

旰食憂民宴樂疎太倉幾有九年儲賈生未解
人間事北闕猶陳痛哭書

紹興庚辰辛巳間游
屢貢瞽言畧蒙施用

糟蟹

舊交髯簿久相忘公子相從獨味長醉死糟丘
終不悔看來端的是無腸

霜夜

梅花欲動夢魂狂
橙子閑搓指爪香
莫怪艸堂清到骨
一梳殘月伴新霜

又

黃甘磊落圍三寸
赤蟹輪囷可一斤
更喚東陽麴道士
與君霜夜策奇勲

時東陽餉酒

又

澹月窺窗似有情
夏堪梅影向人橫
放翁不受

天魔惱獨擁青氍毹
睡到明

書室明煖終日婆娑
其間倦則扶杖至小

園戲作長句

放翁老手竟超然
俗子何由與作緣
百榼舊曾誇席地
一窗今復幻壺天
夢回橙在屏風曲
雨霽梅迎拄杖前
吾愛吾廬得安臥
笑人思穎憶

平泉

李衛公憶平泉山居殿陽公思穎詩皆數十篇

又

美睡宜人勝按摩江南十月氣猶和重簾不捲
畱香久古硯微凹聚墨多月上忽看梅影出風
高時送鴈聲過一杯太淡君休笑牛背吾方扣
角歌

初冬

老客人間百事慵樂哉閉戶過今冬朝爐獸炭
騰紅焰夜榻蠻氈擁紫茸蝟刺坼蓬新栗熟鵝
雛弄色凍醅濃題詩正自消閑日本不爭先萬

戶封

買屐

一雨三日泥泥乾雨還作出門每有礙使我慘
不樂百錢買木屐日日繞村行東阡與北陌不
間陰與晴青鞋豈不佳要是欠耐久何當踏淡
雪就飲湖橋酒

十月晦日作

藤疎不覆架桐落欲平溝閨歲風霜晚衰年日

月適觀書方坐石把釣又登舟不是無羈束閑人得自由

贈道友

凡骨已蛻身自輕勃落葉上行無聲華陰市樓醉舞罷却上蓬峯看月明

又

憶在長安爛漫遊大明宮闕與雲浮今朝偶上慈恩塢北望芒芒禾黍秋

唐舍光殿與慈恩塢南北相直

又

當時辛苦學長生準擬中原看太平今日醉遊心已足一瓢歸去隱青城

又

二盃兀兀復騰騰服氣燒丹總不能偕問生涯在何許孤舟風雨伴漁燈

又

零落殘碑艸棘中北邙蕭瑟又秋風舊時憶在

鶴行裏幾見宣麻拜相公

示子聿

儒林早歲竊虛名白首何曾負短檠堪歎一衰
今至此夢回聞汝讀書聲

老境

平生百不遂惟有老如期眼澀觀書夜心衰把
酒時僧分新掘藥客誦舊題詩四十年前我回
看定是誰

予所居三山在鏡湖上近取舍東地一畝
種花數十株彊名小園因戲作長句

出郭西南十里過小園風月得婆娑翠屏三扇
恰相倚玉鏡一奩誰爲磨投鐻未嫌衰鬢白插
花聊喜醉顏酡耶溪夏盡青鞋興免使將軍怒
脫靴

被命再領沖佑有感

殘骸日益衰晨夜抱疾痛地爐得微火終日不

憲動讀書舊成癖今但坐作夢未能追鴻冥乃
復分鶴俸風霜舍邊柳合抱皆手種眼中人盡
非欲話誰與共

冬夜戲書

東歸剡曲寄彷徨閑日雖冬亦自長梅瘦有情
橫淡月雲輕無力護清霜長魚通印鹽花白珍
鮓披緜麴糝香一飽喟然還自憫彊顏垂老食

官倉

又

將挂衣冠彊小留期年畢竟是歸休青羶獨擁
欺霜夜濁洒頻傾洗客愁鶴影冷翻丹井月雁
聲遙帶玉關秋一生自笑閑中過不爲功名也
白頭

又

老樹霜餘已盡紅縱橫落葉滿庭中一鉤澹澹
西南月萬鼓憑憑東北風賒酒每慚添舊券讀

書何計策新功蓬窗坐睡摧頰甚隔竹敲茶賴
小童

幽居

落葉紛可掃幽花寒自開困空無雀噪門靜有
僧來孤學時方棄窮途勢莫回呼兒了租賦莫
待縣符催

又

雨霽雞栖早風高雁陣斜園丁刈霜稻村女賣
秋茶缺井磨樵斧枯桑繫釣槎客來那用問此
是放翁家

送蘇召叟秀才入蜀効宛陵先生體

士勇赴知己義重身固輕尊公況有命子得辭
此行結廬出門去迢迢過蠻荆泝江卜風色入
峽聽猿聲萬里一紙書南寄孤雁征山陰在何
處計子難爲情願言早來歸鄰曲當出迎檣舟
柯橋市一榼手自傾

寄題哲上人漫堂

老子從來任運行
愛君堂以漫爲名
北印大有英雄骨
枉用工夫過一生

冬夜獨酌

寒水茫茫浸月明
疎鐘杳杳帶霜清
一樽濁酒有妙理
十里荒雞非惡聲
物外雖增新跌宕
胸中未洗舊崢嶸
頽然坐睡蒲團穩
殘火昏燈伴五更

夜坐燈滅戲作

冷飯黃齋傲太平
鬢絲原不爲愁生
忽因燈死得奇觀
明月滿窗梅影橫

艾如張

錦膺繡羽各山雞
清泉可飲林可栖
稻梁滿野棄不啄
雖有奇禍無階梯
東村西村煙雨晚
蕭艾離離林薄淺
翩然一下駭機發
汝雖知悔安能免
漢家天子南山下
萬騎合圍寤日夜
犬牙

金匱詩集 九
鷹爪死不辭觸機折頸吁可悲

上之回

咸陽宮闕天下壯五夏衛士傳雞唱重門洞開
鑿駕出回中夏在雲霄上雲霄一路蟠青冥車
聲隱轡馳雷霆宓妃穿仗王母下何必軒皇居
大庭君王遊幸無終極萬年盡是歡娛日文成
已死方不讎茂陵松柏秋蕭瑟

雜詠園中菓子

不酸金橘種初成無核枇杷接亦生珍產已從
幽園得濁醪仍就小槽傾

又

漿石榴隨餠作節蠟櫻桃與酪同時兩株偶向
池邊種可喜今年墜折枝

又

架垂馬乳收論斛港種雞頭采滿船鼃鼎若爲
占食指麴車未用墮饒涎

又

山杏谿桃本看花
纍纍成實亦堪誇
鹽收蜜漬饒風味
送與山僧下夜茶

閉戶

聲利能令智者愚
放翁閉戶養迂疎
地爐枯葉夜煨芋
竹筩寒泉晨灌蔬
狗俗不如翻著屐
愛山只合倒騎驢
今朝更有欣然處
萬里知心一

紙書

蜀兵來得張季長
歸唐安江原書

又

冠蓋長安幾番新
放翁只似向來貧
滿窗紅日價無敵
半榼新醅香動人
宴坐心光無蔽障
橫眠踵息自清勻
世間不用詢名字
身是無懷上古民

連日大寒夜坐復苦飢戲作短歌

翁飢不能具小殮
兒凍何由成複禪
藏書充棟讀至老
固願少出蘇黎元
念當萬事度可否
肯

使一恨彌乾坤古來賢達多晚謬千載遺笑綺
與園老翁肝心等鐵石他年骨朽此固存村沽
雖薄亦取醉起看江月傾金盆

園中對酒作

偃僂衰翁雪滿顛
夢花耽酒似當年
雖無錦障七十里
也有青銅三百錢
數掩竹籬分小徑
一泓沙井貯寒泉
栽紅接白株株活
坐擁春工太半權

孝宗皇帝挽詞

大道本生知崇高志不移
凝神超事物觀妙極
希夷訪藥三山遠
遺弓萬國悲神孫
簪鍾慶天作太平基

又

代邸膺圖日臨朝涕泗橫
誠心非外飾至孝化
群生高廟聯龍袞
息陵接柏城平生奉親意
一理貫幽明

又

便殿諮詢早淡宮宴樂稀欲頒傳位詔猶索未
明衣壽損名方永身癯國愈肥孤臣泣陵柏心
折九虞歸

小兒入城

小兒破帽出求師老父寒爐夜晝詩不耐青燈
寫孤影聊呼薄酒慰長飢我今僅守詩書業汝
勿輕拊少壯時但恨北風如許惡湖橋歸路想

流澌

夜坐

萬螿披書卷孤螢引篆香病患無事樂老悔少
年狂南渡衣冠盛西征道路長如今俱夢破高
枕看人忙

又

葉盡木無聲天高夜自明映窗燈半滅掠野雁
孤征瓦裂人間事雲浮身後名惟應托長鑱寂

莫送浮生

縱筆

惰游不能耕心媿新春白歎傲茅三間主人終

勝客

又

朝士腰下黃山僧鼻端白放翁俱笑汝飽飯作

閑客

又

溫溫地爐紅皎皎紙窗白忽聞啄木聲疑是敲

門客

又

雪晴蓼甲紅雨足韭頭白雖無萬錢具野飯可

畱客

又

小兒勿大勤使汝髮早白長爲南畝民殊勝東

閣客

郊行夜歸書觸目

老翁病起厭端居隨意東西不問途
霜野艸枯鷹欲下江天雲溼雁相呼
空垣破竈逃租屋青帽紅燈賣酒爐
未畏還家踏泥燎園丁持炬小兒扶

閉戶

老人閉戶動經月嬾就東家借蹇驢
身後有名豈如酒體中不佳聊讀書
秦王開圖見七首漢相狗市載厨車
人間憂怖古如此莫怪荒畦常荷鋤

十一月五日夜半偶作

艸徑江村人迹絕白頭病臥一書生
窗間月出見梅影枕上酒醒聞雁聲
寂寞已甘千古笑馳驅猶望兩河平
後生誰記當年事淚濺龍牀請北征

晴和出遊湖山間

日出氣稍和呼船渡煙津微風西南來水面生
魚鱗適此一日佳聊娛百年身捋鬚俯船舷一
笑彼何人閨餘春事早已覺陽和新梅花處處
開幽香襲衣巾久病喜我出問訊傾鄉鄰舟回
不須速看涌白玉輪

病患

賣劍還山學老農不堪衰與病交攻將軍閉戶
方鋤菜處士攜家欲賃春殘齒彊畱終艱確病
腰扶拜苦龍鍾壯遊誰信梁州日大雪登城望
夕烽

寄子虞

老自安故鄉況復觸罪罟五年三奉祠每請幸
聽許貧家似破屋隨事且撐拄雖殊乞墻肉已
近掘野鼠平生膽力薄不敢犯張禹有時一言
失恐懼氣如縷念此思挂冠白首冀安處吾兒
哀乃翁歲暮忍羈旅何時得斗粟歸舍聊共煮

便艸北關書乞骸歸卒伍

紙閣午睡

紙閣甑爐火一杓斷香欲出礙蒲簾放翁不管
人閒事睡味無窮似蜜甜

又

黃紬被煖青氈穩紙閣油窗晚夏妍一飽無營
睡終日自疑身在結繩前

夜分復起讀書

愁極不成寐起開窗下書似囚逢縱釋如癢得
爬梳燈火夜過半風霜歲欲除平生濟時意却
作夢吾廬

効蜀人煎茶戲作長句

午枕初回夢蝶牀紅絲小磴破旗槍正須山石
龍頭鼎一試風爐蟹眼湯巖電已能開倦眼春
雷不許殷枯腸飯囊酒瓮紛紛是誰賞蒙山紫
箬香

書逆旅壁

百憂襲算年懷抱日騷屑雖云歸故鄉何異萬
里客窮冬迫寒餓凜有在陳厄駕言適近村慘
慘天欲雪人沽村市酒馬齧山坡麥旅炊雜沙
土得飽何暇擇手皸若龜兆面槁無人色士窮
自其分所幸全大節功名已甑墮身世真瓦裂
不學玉關人飢鷹方夜掣

懶趣

謝病掩柴荆年來懶趣成舌根茶味永鼻觀酒
香清已矣馳驅息悠然磊砢平高眠得三昧夢
斷已窗明

閑中富貴

要信人生各有緣閑中富貴亦關天綠窗靜對
千梢竹翠竇新疏一脉泉夔百衲琴常鎖匣買
雙鈞帖不論錢箇中得意君知否不換金貂與
玉蟬

又

天爲疎慵剌與閑一菴青嶂白雲間
衲僧過別歸廬阜羽客來尋說華山
冬筍生林龍觶觶寒泉落澗珮珊珊
俗人自是無因到雖設柴門不上關

書近況寄蜀中道舊

遺事復遺榮空齋一榻橫宿醒投未正
新句煨初成山庵傳梅信天窗送雪聲
戲題勻碧紙遺

鶴報青城

醉中自贈

富貴猶宜早退休一生齟齬更何求
賦形未至欠壬甲語命寧須增斗牛
架里收身貧亦樂平陵埋骨死無憂
狂歌醉舞真當勉剌折梅花插滿頭

明日自和

二頃元知未易求不如馬磨學文休
正令未死

有幾日那得殘年叢百憂
霜野挾弓朝射雁煙
坡吹笛算呼牛興來醉倒尋常事
莫信兒童笑
白頭

雪中至近村

荒山風雪歲將殘
貸粟迢迢犯苦寒
急燎征裘
憩牛屋旋沽村酒
挂驢鞍
清貧徹骨初無憾
老健逢人彊自寬
淡夜還家未能睡
解囊吹火取
詩看

歲暮感懷以餘年諒無幾
休日愴已迫爲
韻

昨算送客歸短襪過魯墟
故廬有遺趾
青山遶
牆隅桑竹雖鬱然
舊植已無餘
瓦礫不可求而
況屋壁書繫舟
問鄰人搔首久躊躇
行當挂朝
衣躬耕返吾初

又

我家釋耒起遠自東封
前詩書守素業
蟬聯二

百年長老日零落念之心惕然每恐後生輩或
爲利欲遷我少亦知學蹭蹬及華顛訟過豈不
力壽非金石堅

又

我壯已早衰晨鏡每惆悵藥物姑自持耆老曷
敢望造物有藥除貧悴博無恙歸鄉夏多感朋
舊盡凋喪客來多避席謂我丈人行此意詎敢
忘報子以直諒

又

士生始志學固爲聖人徒人人可稷卨世世皆
唐虞仰事與俯育治道無絕殊孔孟之所傳世
俗顧謂迂申韓尙刻薄老莊競虛無爾車非不
良盍行九軌途

又

江左謝太傅高臥頗自喜東山豈不佳憺也終
一起阿堅偶自敗元子亦適死區區疑謗中勲

業端有幾當時嘲小艸雖戲實中理所以山中
人至今笑園綺

又

家世本無年甲子近一周小子獨何幸七十今
平頭往者收朝迹亟欲求歸休厚恩許奉祠得
祿歲愈憂三釜不及親顧爲妻子畱何由洗此
媿欲挽天河流

又

高皇咎中興風雨躬沐櫛一士未嘗遺萬里皆
馳駟廉聽闕言路虛懷詢得失孤臣實艸芥亦
獲對宣室龍顏宛在目德不報萬一橋山松柏
寒淚盡史臣筆

又

王師宿梁益行臺護諸將腐儒忝辟書萬里至
渭上旌旗照關路風雪暗戎帳堂堂鐵馬陣
麴木牛餉誰知骨相薄空負心膽壯回首二十

年撫事增悲愴

又

在晉祖宗時風俗極粹美人材兼南北議論忘彼此誰令各植黨更什而迭起中更夷狄旣此風猶未已臣不難負君生者固賣死儻築太平基請自厚俗始

又

井地以養民整整若棊畫初無甚貧富家有五畝宅哀哉古益遠禍始開阡陌富豪役千奴貧老無寸帛困窮禮義廢盜賊起感迫誰能講古制壽我太平脉

桐江哲上人以端硯遺子聿纔寸餘而質甚奇天將雨輒先流泚予爲效宛陵先生體作詩一首

吾兒得巖硯其徑甫踰寸奇哉掌握物乃有琮璧潤器寶備才德初不以形論汝能忘山林懷

之可嘉遯

立春前三日作

春近寒尤苦先生不下堂烏皮蒙燕几白拂挂
禪牀書架斜斜設梅花細細香悠然睡還起已
覺日微長

贈應秀才

過宋不見元城公渡淮不見陳了翁當時人人
皆太息至今海內傾高風老夫七十居鄉縣
甌龍鍾何足見辱君雪裏來叩門自說辛勤來
識面我得茶山一轉語文章切忌參死句知君
此外無他求有求寧踏三山路

春耕

今年液水滿西疇父老人人卜有秋只要耕犁
及時節裹茶買餅去租牛

首春連陰

入春十日九日陰積雪未解雨復漉西家船漏

湖水漲東家驢病街泥深去秋宿麥不入土今年米貴如黃金老嫗哭子那可聽僵死不覆黔婁衾州家遣騎餽春酒欲飲復止吾何心出門空歎歲華速已見微綠生高林

夜坐

衰翁不出門歲月過電雹窗明地爐煖袖手坐寂寞可憐瓶中梅爛漫幾開落小園亦數樹曾未破一萼三夏北風急雨雪恐復作且當勤學
有莫恨浮蟻濁

新春

老境三年病新元十日陰疎籬枯蔓綴壞壁綠苔侵憂國孤臣淚平胡壯士心吾非兒女輩肯賦白頭吟

得季長書追懷南鄭幕府慨然有作

從戎筭在山南日彊半春光醉裏銷綠樹啼鶯窺帽影画橋飛絮逐鞭梢花經小雨開差晚笙

怯餘寒澀未調惆悵流年又如許羈魂欲仗楚
詞招

正月十一日夜夢與亡友譚德稱相遇於
成都小東門外既覺慨然有作

當年與子別江干漸老心知後會難豈料今宵
清夢裏東門交轡說春寒

送陳吏部還朝

邂逅稽山許攬鬚塵埃時得近冰壺不辭我老

雞豚社且喜公歸櫻筍厨滿室琴書懷燕几一

川風雨送行艫勉哉早了功名債要画騎牛第

二圖

先賢良與劉疑之
有廬山騎牛圖

觀碁

一枰翻覆戰枯碁慶吊相尋喜復悲失馬翁言
良可信牧豬奴戲未妨爲白蛇斷處真成快黑
幟空時又一奇斂付兩奩來對酒泠泠聽我誦

新詩

春行

蕩囀絲絲雨芒鞋策策泥柳斜風帶北花歛日
平西社酒誇新壓春蕪喜遍犁淡村無客過父
子自扶藜

雨霽春色粲然喜而有賦

應接年光老漸慵猶能一飲百分空半霑蝶粉
兼籠雨遠送鶯聲巷陌風千縷翅塵楊柳綠萬
文星五海棠紅從來造物陶甄手却在閑人詩

句中

幽思

雲際茅茨一兩間春來幽事日相關臨窗靜試
下巖硯欹枕臥看靈壁山紅練帶飛俱意得錦
熏籠煖尙香慳錦熏籠
謂瑞香今朝社過添惆悵高棟
巢空燕未還

贈持鉢道人

青鐵作小冠白紵縫短褐右扶九節杖左執七

初月詩集

卷之卅一

及古則

綴鉢何嘗有定止到處可生活惟有烈士心白
刃不能奪相逢一笑粲滯思得披豁揮袂去若
飛跂望已天末

柳

楊柳春風綠萬條憑鞍一望已魂消當年鳳集
城邊路曾夢纖纖拂画橋

又

西園雨打杏花稀便面章臺事已非只恐無情
堤上柳又將風絮送春歸

山園雜詠

祠祿畱人未挂冠山園三畝著身寬百年竟向
愁邊老萬事元輸靜處看花徑糝紅供晚醉月
天生暈作春寒汗青事業都忘盡時賴吾兒舉
話端

又

殘春終日在林亭散髮披衣醉復醒科斗已成

鼃閣閣櫻桃初結子青青魚遊滄海寧濡沫禽
慕雕籠卽翦翎薄晚東風吹小雨笑攜長鏡伴
蛙丁

又

桃花爛熳杏花稀春色撩人不忍違俗客年來
真掃迹清樽日暮獨忘歸魚行池面紅雲散鵲
起枝頭絳雪飛莫道顛狂無訴處臥看香篆掩
齋扉

劔南詩彙目錄

卷第三十二

雨夜書感

首二

鏡湖

舟中戲書

春晚

懷山南

首四

春晚書齋壁

七十一翁吟

山茶一樹自冬至清明後著花不已

晨起

春晚雜興

首六

齋中雜題

首四

老

疾戲自贈

夜坐聞湖中漁歌

上巳書

事對酒

自規

窮居有感

春夏之

交風日清美欣然有賦首三 夜歸 農家

歎 三月十一日郊行 初夏行平水道

中 初夏幽居偶題首四 晨起 小圃

幽居 夜賦 閒中書事首二 初夏首十

四月旦作時立夏已十餘日 春夏之交

鳴鳥百族惟布穀聲最悲急動人戲作十

韻 倚杖 野步 竹窗晝眠 騰騰

幽棲首二 睡起 愁坐忽思南鄰小盃之

間首二 四月十三夜四更起讀書 夏雨

初霽題齋壁 東窗 聞泉 雨中示子

聿 山園屢種楊梅皆不成枇杷一株獨

結實可愛戲作長句 夢遊山寺焚香煮

茗甚適既覺悵然以詩記之 夏日 巢

山首二 四月二十三日作首二 觀月 溽

暑 晨起 閒思首二 梅天 夜坐 麥

熟市米價減鄰里病者亦皆愈欣然有賦

雨中作 夜雨 乙卯重五 夏夜風

雨極涼枕上口占 窮居 息蜀 五月

二十三夜記夢 送葉尚書 路傍曲

三首

贈汪叔潛 出遊

劔南詩彙目錄

卷三十一

劔南詩彙卷第三十二

雨夜書感

宦遊四十年歸逐桑榆暖皇恩念黎老一官猶
置散春殘桃李盡風雨閉空館有懷無與陳萬
事付酒椀近代固多賢吾意終不滿可憐杜拾
遺冒死明房瑄慷慨詎非奇經綸恨才短群胡
穴中原令人歎微管

又

儒生不自貴執藝等卜祝詩書定何物爲汝市
爵祿唐虞雖日遠凜凜猶在目誰能舉其要治
功端可復平生麤知此俛仰髮已禿一豪不獲
施老病死巖谷安知萬世後終無可封俗願廣
稽古心端拱咨嶽牧

鏡湖

躬耕斲一飽閔閔望有年水旱適繼作斗米幾
千錢鏡湖決已久造甃初非天孰能求其故遺
迹猶隱然增卑以爲高培薄使之堅坐復千載
利名託亡窮傳民愚不能知仕者苟目前吾言
固應棄悄愴夜不眠

舟中戲書

平生萬事付之天百折猶能氣浩然試問軟塵
金絡馬何如柔艣月侵船英雄到底是癡絕富
貴但能妨醉眠三百里湖隨意住人間真有地
行仙

春晚懷山南

梨花堆雪柳吹絲常記梁州古驛前二十四年
成昨夢每逢春晚卽悽然

又

壯歲從戎不憶家梁州裘馬鬪豪華至今夜夜
尋春夢猶在吳園藉落花

又

梁州一別幾清明常憶西郊信馬行桃李成塵

總閑事梨花楊柳最關情

又

身寄江湖兩鬢霜金鞭朱彈夢猶狂遙知南鄭
城西路月與梨花共斷腸

春晚書齋壁

海棠已成雪桃李不足言纖纖麥被野鬱鬱桑
連村穉蠶細如螿杜宇號朝昏展墓秣餌美坐
社黍酒渾早筍漸上市青韭初出園老夫下箸

喜盡屏雞與豚幽居亦何樂且洗兩耳喧呼兒
燒柏子悠然坐東軒

七十一翁吟

七十一翁心事闌坐叨祠祿養衰殘樽中無酒
但清坐架上有書猶縱觀吏部齒搖心悵望將
軍髀滿淚汎瀾客來共飯增羞澀小摘山蔬不
拚槃

山茶一樹自冬至清明後著花不已

東園三日雨兼風桃李飄零掃地空惟有山茶
偏耐久綠叢又放數枝紅

晨起

初日破蒼煙零亂松竹影老夫起燒香童子行
汲井平生水雲身不墮車馬境願言學龐公全
家事幽屏

春晚雜興

人寂野人家柴扉傍水斜僧分晨鉢筍客共午

甌茶燕戶添新土
蛛絲罥落花悠然
便終日惟此送年華

又

澤國固多雨
暮春猶薄寒
兒童葺茶舍
婦女賽蠶官
閱世年雖往
爲農興未闌
窮途得一飽
亦足慰艱難

又

池面萍初紫
牆頭杏已青
攜兒撐小艇
畱客坐孤亭
相法無侯骨
生年直酒星
正須遺萬事
莫遣片時醒

又

小市湖橋北
幽居石埭西
蒲深姑惡哭
樹密秣歸啼
山茗封青箬
村醅坼赤泥
平生汗簡手
投老慣扶犁

又

病瘍無意緒
閉戶作生涯
艸艸半盂飯
悠悠一

盃茶笑穿居士屨閑看女郎花

唐人謂辛夷爲女郎花園中有

此花一叢二百朵

莫問明朝事忘家卽出家

又

青梅薦煮酒綠樹變鳴禽處世已如客傷春無
復心焚香惟默坐曳杖亦幽尋一日悠然過淡
慙憎寸陰

齋中雜題

列屋娥眉不足誇可齋別自是生涯閑將西蜀
團窠錦自背南唐落墨花

又

小醉微吟過一春人間儂是最閑人龜毛拂子
長三尺拈起風光處處新

又

斐几硯涵鸚鵡眼古奩香斲鷓鴣斑絕知造物
慇懃意成就衰翁到死閑

又

幽居厭見凡花艸紅紫紛紛不復栽自斲蒼苔
換黃土南山移得玉芝來

窗外新移雲門
玉芝一本甚茂

老疾戲自贈

年過七十日夜衰羸然骨立不支持一身百病
作無時飯且不足那論醫鏡中之人定是誰面
骨突兀鬢成絲買棺作冢計已遲一旦寧免累
諸兒門前湖山可遨嬉心雖欲往力不隨左車
牙脫吁可悲問汝何不食肉糜

夜坐聞湖中漁歌

少年嗜書竭目力老去觀書澀如棘短檠油盡
固自佳坐守一窗如漆黑漁家裊裊起三更哀
而不怨非凡聲明星已高聲未已疑是湖中隱
君子

上己書事

單衣初著下湖天飛蓋相隨出郭船得雨人人
喜秧信祈蠶戶戶斂神錢黃雞煮臠無停筋青

韭菹菹欲墮涎丞相傳聞又三押衡茅未改日
高眠

對酒

手摘醱醖翦牡丹山家艸艸亦杯盤溪頭一夜
風吹雨又作殘春幾日寒

自規

陸君拙自謀七十猶糲食著書雖如山身不一
錢直默自觀我生困弱良得力轉喉畏或觸唾
面敢自拭世路方未夷機穽寧有極但能常閉
門尊拳貸雞肋

窮居有感

孤村煙艸暮淒迷笠子蓑衣自架犁生計似蛛
聊補網弊廬如燕旋添泥人亡耆舊多時學地
廢陂湖失古隄迂闊自知無著處敢因窮厄怨
推擠

春夏之交風日清美欣然有賦

日鑄珍芽開小缶銀波煑酒湛華觴槐陰漸長
簾櫳暗梅子初嘗齒頰香戶戶祈蠶喧鼓笛村
村乘雨築陂塘年光何預衰翁事件蝶隨鷺也
解狂

又

天遣殘年脫馬鞵功名不恨與心違綠陂細雨
移秧罷朱舫斜陽擘紙歸花市丹青賣團扇象
牀刀尺製單衣白頭曳杖人爭看共歎浮生七

十稀

又

芳潤園林不似貧年光無盡逐番新來禽顏色
不禁雨搏黍語言如惜春身外豈關吾輩事鏡
中已換管時人神僊定未超塵俗猶插金貂侍
帝晨

夜歸

疎鐘渡水來素月依林上煙火認茅廬故倚船

蓬望

農家歎

有山皆種麥有水皆種杭牛領瘡見骨叱叱猶
夜耕竭力事本業所願樂太平門前誰剝啄縣
吏徵租聲一身入縣庭日夜窮笞撈人孰不憚
死自計無由生還家欲具說恐傷父母情老人
儻得食妻子鴻毛輕

三月十一日郊行

到處人家可乞漿槐陰巷陌午風涼水陂漫漫
新秧綠山隴離離大麥黃父子力耕春漸老婦
姑共績夜猶長堯民擊壤雖難繼芹美懷君未
敢忘

初夏行平水道中

老去人間樂事稀一年容易又春歸市橋壓擔
蓴絲滑村店堆盤豆莢肥傍水風林鶯語語滿
原煙艸蝶飛飛郊行已覺侵微暑小立桐陰換

夾衣

初夏幽居偶題

放逐還家一老翁，癡頑自笑更誰同。
倚欄風月黃昏後，攜杖園林綠潤中。
泳水小魚依藻荇，覓巢輕燕拂簾櫳。
此身要豈堅牢物，莫遣須臾酒盞空。

又

展盡高槐日漸長，了無蜂蝶爲花忙。
青梅旋摘宜鹽白，煮酒初嘗帶臘香。
林下光陰無一事，水邊窗戶有餘涼。
應門不用辭衰疾，車馬何由到野堂。

又

咎如轉戰墮重圍，今幸鸞翔脫駭機。
曉樹好風鶯獨語，夜窗細雨燕相依。
安居不恨蝸廬窄，得食寧論鶴料微。
更喜暮年彊健在，又看刀尺製縑衣。

又

朱櫻羊酪喜新嘗
碧井桐陰轉午涼
書几得晴宜試墨
衣篝因潤稱熏香
枯龜自覺支牀穩
老馬安能試艸長
半世學騷終不近
空餘清夢上

沅湘

晨起

青青水中萍粲粲牆下艸
開歲纔幾時已歎春
事老鳴禽傍窗戶
怪我倦幽討長吟感人懷
病枕起亦早下牀呼獠奴
浩蕩恣灑掃綠陰
列蒼石芳樽得頻倒
客來但與飲談天
有何好亦莫雕肺肝
吟哦學郊島

小圃

剡曲西邊築草堂
小園聊復寄羊魚
行水際汀蘋動麝過
林中野草香
覓句有時攜筆硯
遣懷隨事具杯觴
少年朋舊凋零盡
不獨思人亦自傷

幽居

青門不種故侯瓜
揀得湖山便寄家
老境一廛依水竹
壯遊萬里犯風沙
氣衰那辦飲無算
病著更知生有涯
莫道吾廬全索寞
猶東新補數株花

夜賦

小齋寂寂似禪寮
臥數更籌覺夜遙
帳外殘燈欺不寐
梁間棲燕伴無聊
江湖蹭蹬朱顏改
憂

朝

七
凌壯志消挂旆
天山少年事此身
終負聖

閑中書事

病過新年逐日添
清愁殘醉兩厭厭
憺花萎去常遮日
待燕歸來始下簾
堂上清風生玉麈
澗中寒溜注銅蟾
一生畱滯君休歎
意望天公本自廉

又

一畝山園半畝池
流年忽逮挂冠期
賣花醉叟剝紅桂
種藥高僧寄玉芝
午枕爲兒哦舊句
晚窗畱客算殘碁
登庸策免多新報
老子癡頑總不知

初夏

紛紛紅紫已成塵
布穀聲中夏令新
夾路桑麻行不盡
始知身是太平人

又

翦韭醢蠶粟作漿
新炊麥飯滿村香
先生醉後騎黃犢
北陌東阡看戲場

又

稻未分秧麥已秋
豚蹄不用祝甌窶
老翁七十猶彊健
沒膝春泥夜叱牛

又

買得新船疾似飛
蠶飢遙望采桑歸
越羅蜀錦吾何用
且備幽人卒歲衣

又

槐柳成陰雨洗塵櫻桃乳酪併嘗新古來江左

多佳句夏淺勝春最可人

夏淺却勝春
徐陵詩也

又

杜鵑血盡啼未歇蝴蝶夢殘心更狂我自人間
少情者老來十倍憺年光

又

賜食金盤出寶闈玄熊掌映紫駝蹄侯家但詫

承恩澤豈識山厨苦蕡莖

又

隋家古寺郡西南寺廢殘僧只二二三藜藿滿庭
塵闍佛時聞鏡鼓賽春蠶

又

渺渺荒陂古埭東柳姑小廟柳陰中放翁老憊
扶藜杖也逐鄉人禱歲豐

又

老翁賣卜古城隅兼寫宜蠶保麥符日日得錢
惟買酒不愁醉倒有兒扶

四月旦作時立夏已十餘日

京塵相值各匆忙誰信閑人日月長
爭葉蠶飢開風雨趁虛茶嬾鬪旗槍
林中晚筍供厨美庭下新桐覆井涼
堪笑山家太早計已陳竹几與藤牀

春夏之交鳴鳥百族惟布穀聲最悲急動

人戲作十韻

春風捨人去陸子歎以驚欲挽春使回無奈布
穀聲春亦何負汝旦暮聲不停或謂布穀者一
氣感使鳴春老自當去微禽彼何情上天運四
時斗柄亦崢嶸奈何獨私春欲使久不傾南風
吹衆綠一掃紫與頰此時豈不佳乃爾懷不平
勿作兒女態起視東郊耕

倚杖

倚杖柴門外，踟躕到日斜。
兒童拾筍籜，婦女賣茶芽。
掠岸過漁艇，隔籬聞緯車。
年來詩料別，滿眼是桑麻。

野步

蝶舞蔬畦晚，鳩鳴麥野晴。
就陰時小息，尋徑復微行。
村婦窺籬看，山翁拂席迎。
市朝那有此一笑，慰餘生。

竹窗晝眠

初夏暑雨薄，但覺白日長。
向來萬里心，盡付一竹牀。
新筍出林表，森然羽林槍。
時聞解籜聲，靈府生清涼。
平生喜晝眠，此志晚乃償。
安枕了無夢，孰爲蝶與莊。
徐起掬寒泉，中有菱絲香。
清歡遂落日，與世永相忘。

騰騰

騰騰吾喪我，兀兀我忘吾。
萬事皆墮甌，一身真朽株。
江天號鶴鶴，村巷暗楸梧。
薄酒猶堪醉，歸

來稚子扶

幽棲

閑人了無事地僻稱幽栖
帥米罾雞食移琴避
燕泥桐生窗欲暗筍長徑還迷
不作容車計門
閤儘放低

又

誰謂幽棲陋茅茨足庇牀
雨便梧葉大風度練
花香浴佛兒童喜縑絲
婦女忙竭來三十載吾

鬢固宜霜

乾道丙戌始卜居鏡湖
之三山今甫三十年矣

睡起

虛堂四簷竹脩脩
朱夏正午如高秋
八尺風漪雲碧裊
一榻寬如禹九州
屈信展轉俱自由
息以兩踵無與喉
世方窘若魚吞鈎
我獨超然鷹脫鞴
一物不向靈臺畱
非睡非覺以神遊
青城紫閣多朋儔
相逢握手笑不休

愁坐忽思南鄭小益之間

當年蜀道秦關萬里飄然往還酒病曾畱西縣
眼明初見南山

又

籌筆門前芳艸回龍道上青山萬里猶能夢到
再遊未信天慳

四月十三夜四更起讀書

七十未捐書正恐死乃息起挑窗下燈度此風
雨夕

夏雨初霽題齋壁

楸花練花照眼明幽人浴罷葛衣輕燕低去地
不盈尺鵲喜傍簷時數聲對奕軒窗消永晝曬
絲院落喜新晴忽驚重五無多日采縷纏筒弔
屈平

東窗

萱艸石榴相續開數枝晚筍破蒼苔背人紅練
穿林去直是無情不再來

聞梟

兩忘堯桀自心平此念胡爲掃復生幸是安眠
無一事苦憐鶯語惡梟聲

雨中示子聿

窮閭父子自相依寂寂茅廬映竹扉瓜蔓水生
初抹岸練花寒動却添衣吾玄自笑豈尙白汝
瘦元知能勝肥苦學勿爲干祿計宦途雖樂不
如歸

山園屢種楊梅皆不成枇杷一株獨結實
可夢戲作長句

楊梅空有樹團團却是枇杷解滿盤難學權門
堆火齊且從公子拾金丸枝頭不怕風搖落地
上惟憂鳥啄殘清曉呼僮藥露摘任教半熟雜
甘酸

枇杷盡熟時鴨身不可復
禦故熟七八分則取之

夢遊山寺焚香煮茗甚適旣覺悵然以詩
記之

平日居山恨不深
暫來差足慰幽尋
僧歸共說
道逢虎院靜
惟聞風滿林
毫蓋雪濤驅
滯思篆
盤雲縷洗塵襟
此行殊勝邯鄲客
數刻清閑直
萬金

夏日

柴扉晝掩竹林幽
坐使炎天變素秋
扇月團團似初滿
葦波細細欲平流
朋儕零落關河阻
疾病沉緜歲月遒
賴有澄湖常在眼
虎頭不用画

滄洲

巢山

巢山避世紛身隱
萬重雲半谷傳樵響
中林過
鹿群蟲蝨葉成篆
風蹙水生紋不蹋
溪橋路僊
凡自此分

又

短髮巢山客人知
姓字誰穿林
雙不借取水一
軍持渴鹿群窺澗
驚猿獨裊枝
何曾畜筆硯景

物自成詩

四月二十三日作

颭颭荷離水翩翩燕出巢苔添雨後暈筍放露
中梢世路千重浪生涯一把茅欵門僧亦絕無
句鍊推敲

又

莫笑茅廬迮何曾厭日長飯餘食酪滑浴罷葛
巾涼落日桐陰轉微風梔子香貧家猶裹粽隨

事當年光

觀月

清風發疎林皦月上素壁悠然倚庭楯愛此風
月夕人間好時節俯仰成宿咎少年不痛飲老
大空歎息

溽暑

溽暑雨將作南風來解圍幽花臨砌坼乳燕傍
巢飛腰斧剥桑去攜籃采藥歸翻憐少年老疊

雪詫宮衣

晨起

衰老少睡眠睡晚覺常早五更攬衣起漏鼓猶
考考青燈取孤影不睡坐亦好讀盡一編書南
窗朝日杲

閑思

溝水細無聲窗扉晚更明簾開燕雙入人靜鵲
群行青李求初至黃醅釀已成出門無奈嬾不

是傲公卿

又

小雨時時作幽花續續紅新蟬落庭樹癡燕集
屏風傍枕拋書卷臨池下釣筒閑中有真樂那
得歎途窮

梅天

稻壠移初遍梅天澀未晴輕陰昏茗色餘潤咽
琴聲時傍菱塘立還尋沙徑行杜門終此世更

初南詩藁

卷之州二

及古閣

誓未來生

夜坐

燈暗一室幽鳥鳴四山靜道人坐倚壁度此清
夜永少時志功名癡絕如捕影造物遺以窮磨
礪發深省坐令盆盎淺渺渺波萬頃雖未造道
真南轅終至郢

麥熟市米價減鄰里病者亦皆愈欣然有

賦

凶年已度麥方秋學道從來幸寡求荷鍾自隨
身若寄漉籬可賣飯何憂隣翁瀕死復相見村
市小涼時獨遊不怕歸時又侵夜新添略徇跨
清漑

雨中作

風聲如翻濤雨點如撒菽皇天念此老一爲洗
煩促呼童取短檠聊展舊書讀悽然對孤影感
歎衰鬢秃兀如老病馬關河久在目伏櫪雖已

疲連雲思首齒

夜雨

齒牙搖動鬢毛疎四壁蕭然臥艸廬急雨聲酣
戰叢竹孤燈焰短伴殘書壯心未減從戎日苦
學猶如覓舉初自笑堅頑誰得似同儕大半已

丘墟

乙卯重五

重五山村好榴花忽已繁粽包分兩髻艾束著

危冠舊俗方儲藥羸軀亦點丹日斜吾事畢一
笑向杯盤

夏夜風雨極涼枕上口占

北窗八尺臥文藤夜雨生涼洗鬱蒸裊裊清愁
縈斷角悠悠孤夢伴殘燈羸軀垂老嗟焉往公
論猶存似可憑聊向斯文圖不朽未甘粥飯學
山僧

窮居

半世佞倖信所之
寤居仍抱算年悲
燒金術誤囊衣薄
種黍年凶酒味醜
大厦萬間空有志
後車千乘更無期
掩書常笑城南杜
麻屨還朝授拾遺

思蜀

白首躬耕遇游饑
江南自笑欲疇依
凌煙勲業無人許
濯錦園林有夢歸
心似遊僧思遠適
身如敗將陷重圍
客來彊欲相寬釋
每說人生七

十稀

五月二十三夜記夢

夜漏欲盡雞初唱
夢到神仙信非妄
泉流直舂碧澗底
松根橫走蒼崖上
徐行林際遇飛橋
峭壁驚濤臨萬丈
非惟履嶮足蹠蹕
已覺處幽神悄愴
空巖滴乳久化石
寶蓋珠璣紛物象
鬼神慘澹疑欲搏
龍蜃蜿蜒誰敢傷
長眉老仙藥白雲
握手授我綠玉杖
三生汝有世外緣
一念已

斷塵中障雖云曩事不復憶憐汝瞳子神猶王
何須更待熟金丹從我歸哉住崑閩

送葉尚書

曩歲榜扁舟萬里歸自蜀五月下瞿唐六月過
浮玉於時始識公一笑忘暑毒羽扇臨清流華
觴跋紅燭一別十五年去日如電速孤生晚還
朝歛退慙陸陸要津非所冀見公心自足斥歸
又七載衰病將就木造物哀其寤公來位嶽牧

每見語諄諄與世異寒燠聖朝方急賢登用及
釣築如公實舊德顧豈待夢卜初聞一札下已
報四輩趣懸知新天子虛懷須啓沃願公論其
大始爲天下福卽宣垂拱麻寧復摛文宿

路傍曲

冷飯雜沙礫短褐蒙霜露黃葉滿山郵行人跨
驢去

又